

REVELESEN

KAYAKNU AMEG WAK NAI KRISTUS NUG JOHANES IPUNITOM

¹ Kayak Nug Jesus nuhikud udat danab, ag adi keeke beḱunu daate ipuanadḱunu amu Jesus ipunitom. Ipunitē, Jesus he, nuhig engel laa Johannes amu ipunitēb, nug amu bukpa yaaḱunu uḱiom. ² Uḱia ipunitē amu Johannes keeke oh antom ele amu, iiku bukpa yom daate. Nug Kayak adi keeke Jesus ipunitē, Jesus engel amegpa a, engel Johannes ipunitom ele amu iiku yom. ³ Danab aun adi ag Kayaknu nai, keeke dimpa beḱunu imu eb qena dim lamidteb, o aun adi ag nai imu daulagpa doona dimlamidteb ele amu, ahilagnu am ena. Adinu? Haen amu uḱikunu hete amunu Kayak Nug keeke laala beḱunu aum am Nug aaku beḱu.

JOHANES NUG KRISTEN TAMANIAK EBLAIH ADIT ELE DILAG NAI YOM

⁴ Da Johannes, da kristen tamaniak eblaih adit ele Asia wanpa daateb ele amu, ahilagnu iiku yaatem. Kayak Nug gemu daate, anuka dayom, dimpa uḱiku ele, Nug amu nuhig Ouḱi, kobol ena oh am nuhigpa am bak daate amu ⁵ Jesus Kristus, nuhigpa Kayaknu maḱiak tutuku daate anidtem, Nug danab mauhpig ele amu ahilag edua hibaitak danab anuqak, wanpanu king oh dilag okai ele daate amu, ewam amu oh ag ahilag ehanitak okai hamu megteb amu ahilag maḱoḱ ele amu, ag danab ag tamaniak eblaih adit ele oopa daateb amu ahilagpa daaglahnu ool daate.

Kristus Nug ihinignu oo mauhe, Nug tiigpa ihinig hipunin oh uhuqom, ⁶ ig Nug Mamegnu gumak danab amu mana metak danab ele meikom amu ig haen oh Nug onig binag ele meta, Nug waapaib daatu! Genab. ⁷ Anteg! Nug edua lombigpa neku. Danab oh ag Nug anidkulag. Yo danab ag Nug ban hawadpa yaapig ele amu, ag ele Nug anidkulag. Amu wan ohpan danab ag Nug anidna, amunu ehed dooglag. Ao, keeke amu anam beku. Genab.

⁸ Nadi Kayak Nug inam ate. “Da iikuib haen oh daatem, daib gemu daatem, anukanab daadmi, dimpa ele udikulnu daatem. Da am gagatag oh ele,” awa ate.

⁹ Da Johanes, da ag awalag amalag, da ag ele ig oh Jesus nuhigpa laipu daat, ug mua ele imu maotem. Da Kayaknu do madod oopa, amunu udat haknu, ag ele daatem. Ig oh Jesusnu gagatag aot daatta, ug oh maotem. Da Kayak nai matieye, Jesus Kristusnu oolpa genab dootem amunu ami, amunu ag da nud laa onig Patmos, amupa meidpig.

¹⁰ Metidpa amu Kayak Oudinug gagatag dahilpa am ba he, da baag laa biugal oqoti bia da dimulpa matieye doomi.

¹¹ Baag amu nug inam aum. “Na keeke oh anidna amu na bukpa yona mepe, kristen tamaniak eblaih adit ele onilag Epesus, Smena, Pegman, Tiatira, Sadis, Piladelpia amu Leodisia ele amu ahilagpa ukad!” awa aum.

¹² Nug anam aawo, da danab nai amelpa aum ele amu anidkulnu eduen neegmi. Da eduen amu lam baelag ele golpa hak, eblaih adit ele daegeg anadmi. ¹³ Anam andete amu da laa, nug danab bia, lam baelag amu oh oolagpa hibaita dayeye anidmi. Nug lamen elab uka baegpa batak mewowa, matagid gol ele imugpa takom.

¹⁴ Nug iki udug amu hakabnab, Nug ameg amu ab ewa

didite amubia. ¹⁵ Nug baeg amu kopa laa onig bras amu aon, ab adupa manaeg ewa, le ma oug me, lamempa o keeke laapa opina aweg, aam ye amahalte amubia. Aria nug baag oqoti amu le bududu kudum oqoti oteb amubia doomi. ¹⁶ Nug epeg nadiappa amu hodopai eblaih adit ele adom. Qep elab aeg laih laih aegnab ele amu nug odepa dayom. Nug idu amu aam gagatagnab naana amahalte amubia amahalom.

¹⁷ Da Nug anam antena, mauhak bia Nug baegpa nein qemi. Amge Nug epeg nadiap da qadelpa maama, Nug da amelpa aum. “Na aib badame, Da daka haen oh daatem.

¹⁸ Da bauklel hanhannu ele daatem. Da mauhmi amge ante, da bau daatem, gemu, hanhan ele. Amu danab mauhpig ele da ahilag okai daakulnu onil ele.

¹⁹ Amunu keeke na anidtem imu am keeke gemu daatebnu amu keeke adi dimpa bekulagnu ele amu oh bukpa ye! ²⁰ Na da epel nadiapa hodopai eblaih adit ele anidme amu lam baelag eblaih adit ele amu ele anidme amu diig amu inam. Hodopai eblaih adit ele amu kristen tamaniak eblaih adit ele amu dilag iki danab. Lam baelag eblaih adit, amuam kristen tamaniak eblaih adit amu aakuib,” awa aum.

2

NAI EPESUS KRISTEN TAMANIAKPA UKOM

¹ Nug anam anana Nug baula tudita Johanes amegpa aum. “Na Epesus kristen tamaniaknu iki danab amu nai da atem imu nuhignu inam ye! Nai imu, laa Nug hodopai eblaih adit ele epeg nadiappa adalatata, lam baelag ele eblaih adit ele oolagpa oite amu nuhigpan udite. ² Da dootem, nahip hak amu udat okai nahip ele gagatag daate.

Na danab nau dilag ele oot iinab hete. Ag na amenpa, 'Ig am ipunitak danab,' apig amge ag ham bupuidpig. Na ahilag ham bupuk amu epedie, ag miag atipig. ³ Da dootem, na gagaṭag daatem, na da onilnu ehed laala na bedunpa beum amu, na amupa na gai iita ii meme.

⁴ Amge ehed hak nahip laipu imunuib am iiku da na amenpa aтем. Na anuka baubu dig makpa nahip oo mauhak dahilnu heme amu gemu am oo mauhak nahip amuam na uume, amupa am na aaku nena qeme. ⁵ Na tatam daame amu na dautpa doad! Dautpa dob, oot edueb, hak nahip tatam heme ele amu baula he! Iita amu da uken, lam baeg nahip amu abenpanu edue aokul. ⁶ Amge kobol imu am nahippa ena daate. Na Nikolas adi dilag hak nau amu guhuditem, da ele Nikolas adi dilag hak nau guhuditem.

⁷ Am aun nug daug ele dayeb amu nug Kayak Oudi kristen tamaniakpa nai mehuqte imu doyaḍ! Laa nug ban amu edidku amu da nug bau hanhan dayaknu ad meu, Kayak epeḡpanu uḍite ele amu, medapi laku," awa aum.

SMENA KRISTEN TAMANIAK DILAG NAI

⁸ Anam anana Nug nai tuḍita aum. "Na Smena kristen tamaniaknu iki danab amu nai da aтем imu nuhignu inam ye! Nai imu, laa Nug hanhan daate, anuka Nug mauhom amge Nug bau daate, nuhigpan uḍite. ⁹ Da guitak ug ele nahippa beum amu doomi, na keeke iita, amupa qagaitaknab daame amge na keeke kudum ele! Da danab laa ag dapidna, aon aon nidapig amu da doomi. Laa ag amu apig amu ag, 'Ig am Juda,' aon apig amge ag am Juda tutuku iita, ag am Satannu daupib. ¹⁰ Nakok laa ele ag ug baula maoglag amge ag keeke amunu aib badapig. Doyeg!

Ag Smena daateb ele amu, ag ahilag oopa genab doyak am genab o genab iita doyaknu amu Satan nug heeb, ag oolagpanu laala mani guitakpa maadkulag. Laa amu ag ahilagpa ehed hadkulag amge ag haen tutuib ug amupa daaglag. Amu na ootpa genab doyak gagatag adape ukeb, haen na mauhtem amupa amu da na bauklel hanhannu medakul.

¹¹ Danab nug daug ele dayeb amu nug Kayak Oudi Nug kristen tamaniak oh oopa nai madite imu doyard! Am danab aun laa nug ban amu edidku amu mauhak dimpanu amu nug heeb ii nauhma. Iitanab,” awa aum.

PEGMAN KRISTEN TAMANIAK DILAG NAI

¹² Nug anam anana amu Nug tudita aum. “Na Pegman kristen tamaniaknu iki danab amu nai da atem imu nuhignu inam ye! Nai imu laa Nug qep elabnab nob hawad amu aeg laih laih ele adate amu nuhigpan udite. ¹³ Da nahip dayak amu dootem. Satan nug aben amupa nug okai daate amge na da onil gagatag adatem. Na dahilnu ootpa genab dootem, laa ele amu na ootpa genab doyak ii lokumtem. Anuka Antipas, danab amu nug nai dahil mehuqtom ele amu, nug ag ele daanna, nug nai dahil dim lamidtom. Dim lamitete, ahilag ab okai, Satan nug agupa daate ele, amupanu danab ag nug qeeg mauhom. Qeeg mauhe, haen amupa ele ag tamaniak oopa daateb ele amu, ag da onil ii lokumpig.

¹⁴ Amge da nai laipu laipu imu amu na amenpa akulnu hetem. Nahipad danab laa Pegman apa ana daateb, ag Belannu kobol amu gagatagnab adateb. Nug Belak ipunite, Belak nug he, Israel danab ah ag hipuninpa nena qepig. Nug a, Israel adi ag danab laa, ag dod main kayak

ham bupuak medapig ele amu, dodu amu lanana, gapai kobol ele hepig. ¹⁵ Amubia laala na ele apa ana daateb. Amu ag Nikolasnu daup amu ahilag nai gagatag adateb. ¹⁶ Amunu amu na oot eduad! Iita amu nakok laa ele da na gumiten gopi, qep nob hawad aeg laih laih ele da odelpa daate amu, da amupa danab amu ele nug qekunig.

¹⁷ Danab nug daug ele dayeb amu Kayak Oudi Nug kristen tamaniak oh oopa nai mehuqte amu doyad! Aun nug ban amu edidku amu da hab atannu bret onig mana amunu laa medakul. Da nug men dodo hakab laa ele nug medakul. Men dodo amupa onig bau yak ele. Laipu laa nug onig amu diig ii dooma, aun nug da metami ele amu, nug aakuib dooku,” awa aum.

TIATIRA KRISTEN TAMANIAKNU NAI

¹⁸ Anam anana Nug tudita aum. “Na Tiatira kristen tamaniaknu iki danab nai da atem imu nuhignu inam ye! Nai imu am Kayak Bekanu, Nug ameg ab didite bia, Nug baeg amu bras bia amahalte. ¹⁹ Da nahip hak, nahip oo mauhak, oopa genab doyak nahip, ehanitak udatpa danab ah ehanadtem ele amu da dootem. Aria na ug kudum anidme amge na gagatag daame, na kobol oh tatam heme amu ena, am geha dimpa hetem amu kobol tatam heme amu editak enanagnab hetem amu, da amu ele dootem.

²⁰ Amge da nai imu na amenpa akulnu hetem. Na ah Jesebel, nug nuhig haknu amu na nug amegpa aib ii atem. Nug, ‘Da am propet ah,’ awa ate amge nug anam ii daate. Nug anam anana, nug ele dahil udat danab ipuanate, ag gapai kobol henana, laa ag dodu main kayak ham bupuak medapig ele amu, ag dodu amu ele lateb. ²¹ Da nug oo edukunu haen metami amge iita. Nug nuhig gapai kobol

ii uuom, oo ii eduom. ²² Na doye! Da geha nug ode, guitak ele okainab nug medakul. Aria danab ag nug ele gapai kobol hepig ele amu, ag ele oolag ii edueb, gapai kobol ii di medapeg amu ag ele ode qagaitak ele mada kul. ²³ Da nuhikud nid ele hepi mauh kulag. Amupa kristen tamaniak oh ag dooglag, da danab oolag amu ahilag dab mak ele epedie aute aotem, amu ele da ahilag hak atemu amu amupa nob mada kul. ²⁴ Amge laala Tiatira daateb ele, ag ah amu nuhig nai dab ii medteb amu, ag Satannu dab mak, danab laala ag amunu, 'Dab mak amuam unuqagnab daate,' aon ateb ele amu, ag amu ele ii dim lamidteb amunu da ag amelagpa inam atem. Da ag keeke ugnab laa ii madapa. ²⁵ Ag nai aopig amu aakuib adan daapeg, da edue udikul.

²⁶ Amu danab aun nug ban amu edita, dahil hak amu atog noobob ukeb, gog tak haenpa da nug ab ab oh dilag iki daakunu onig medakul. ²⁷ Nug danab amu hokat aenpa hak amupa gumadku, nug danab laa he, wa aode, maha kudum nete, amubia danab amu gumadku. Mame Nug da amubia hekulnu onil medom, amubia da nug onig anam medakul. ²⁸ Am da nug wakadak haenpanu hodopai boitinan amu ele medakul. ²⁹ Anam amunu danab nug daug ele dayeb amu nug Kayak Oudi Nug kristen tamaniak oh oopa nai mehuqte imu doya!" awa aum.

3

SADIS KRISTEN TAMANIAK DILAG NAI

¹ Anam anana Nug nai tudita aum. "Na Sadis kristen tamaniaknu iki danab nai da atem imu nuhignu inam ye! Laa amu Kayak Oudi, kobol ena oh amu nuhigpa am bak daate amu Kayak Oudi Nug nuhigpa am bak daate amu

Nug hodopai eblaih adit ele adaladte ele amu, nai imu nuhigpan uđite. Da nahip hak oh doyen malami. Danab ag ahilagnu, ‘Tamaniak nahip am bauklel ele,’ aon ateb amge iita. Na bauklel iita, na mauhme. ² Aib niime, na ahan bedun aon oiye! Kobol ena na adatem ele mauhkunu hete amu, na edun gagaṭag meṭe! Adinu? Nahip hak oh am dahil Kayak noobpa tutukunab laa ii anidmi. ³ Amunu amu na kobol ena aon doome ele amu, na dautpa dob, dim lamidnana, oot eduad! Na amen ii opateb daape amu da yab danab uđite bia nahippa nokul. Da haen adekupa nahippa nokul amu na ii doomna.

⁴ Amge laipu laipu Sadis apa daateb, danab ah amu ag ahilag hak dubuṭid ii medapig. Ag lamen hakab tagapeg amu da ele oignig. Adinu? Ag ahilag hakpa amu hekulagnu elele. ⁵ Am danab aun nug ban amu edidte amu, nug danab ag lamen hakab tagapig ele amu, nug ag oolagpa ele dayaya, lamen hakab ele tagaku. Da nug onig buk laa, onig bauklel awa onig yaknu buk, buk amupanu ii obipa. Iita, da nug da Mamel noobpa amu engel noolagpa ele nug onig miag akul. ⁶ Am laa nug daug ele dayeb am Kayak Ouđi Nug kristen tamaniak oh oopa nai mehuqte imu doyad!” awa aum.

PILADELPIA KRISTEN TAMANIAK DILAG NAI

⁷ Anam anana Nug baula aum. “Na Piladelpia kristen tamaniaknu iki danab nai da atem imu nuhignu inam ye! Nai imu, laa Nug opia awaknab ele, Nug kobol genabnu diig, Nug Dawitnu ki ele, Nug od matulte amu laa nug ii maite, Nug maite amu laa nug ii matulte ele amu, nuhigpan uđite. ⁸ Da nahip hak oh anidmi. Ante! Da na noompa od matule meṭami, laa nug maiḱunu elele iita. Na

nahip gagatag nakok ele amge na dahil nai dim lamidna da onilnu ham ii bupume, da onil ele ii lokumme. ⁹ Iikud ante! Da hepi, Satannu danab amu ag ham bupunna, ‘Ig Juda danab,’ ateb ele amu, da hepi, ag geha na noompa dup nokulag. Amupa ag da nahipnu ool huanak mauhte amu dooglag. ¹⁰ Na dahil nai dim lamidna, ug oh anidme amge na gagatag daame amunu da danab ah wan atu oh dilagpa ug nađi, ag diilag doyaknu beku amu, da na atog noidkul, ug amu nahippa ii bema.

¹¹ Da paha edue uđikul. Laa nug nahip keeke ena, King igipanu bala bia amu, nug aomanu, keeke na aome amu na gagatag adan daye! ¹² Am danab nug ug amu oh edidku amu da nug dahil Kayak laugpa anuqak mepi daaku, nug haen oh lag uua dimitim ii wama. Nug bedupa dahil Kayak onig amu dahil Kayaknu ab okai onig ele yaakul. Ab okai amu Jerusalem bau, dahil Kayak topanu atannu neŕe. Am da onil bau ele nug qadepa yaakul. ¹³ Amunu amu danab aun nug daug ele dayeb amu Kayak Oudı Nug tamaniak oh oopa nai mehuqte imu doyađ!” awa aum.

LEODISIA KRISTEN TAMANIAK DILAG NAI

¹⁴ Anam anana Nug baula aum. “Na nai imu Leodisia kristen tamaniaknu iki danab, nai da atem imu nuhignu inam ye! Nai imu, laa Nug nai genab diig, Nug Kayaknu nai tutuku ipunigte, hanhan Nug nai genabib ipunigte, Kayak keeke hatom amu ele Nug atog noadte amu nuhigpan uđite. ¹⁵ Na kobol oh heŕem amu da dooŕem, na gamagmag daaŕem amunu da nahipnu oolpa ena ii dooŕem. Na nahip dab mak laipuib daalo am ena. ¹⁶ Amge iita, na gamagmag daaŕem amunu da odelpa na diit miag atipi dookutnu heŕem. ¹⁷ Na nai inam maditem. ‘Da amu enul

ele amu da keeke kuḁum ele daaṭem. Da keeke laanu tutu iṭa.’ Amge iṭa, na amu da amelpa daḁek danab daaṭeb bia daaṭem. Danab ag nahipnu oolag dookunu amu eledenab. Na amu daḁeknab daaṭem amu amen gaḁuak bia amu bam iṭa bia ele daaṭem. Na naḁa amu, na imu ii dooṭem ¹⁸ amunu da dab mak na medaṭem. Na gol, ab ewewe enanag opia awak beum amu, na dahilpa daden mena, na enun ele daaḁut. Amu na lamen haḁab laa, na beḁun taḁidḁutnu amu, na amu ele dahilpa daden meḁut. Dahilpa daden mepe amu danab ag baula na bam iṭa, uḁan neebab daape ii anidmana. Amu na marasin na amenpa meḁutnu ele dahilpa daden me! Na anam hena amu na neegna anidḁut.

¹⁹ Da beḁalad dilagnu ool mauhe amu da ag tutuḁu daaglagnu ag daulag batete, ahilag kobol ena beḁulagnu bapaladṭem. Amunu na kobol nahipnu dab mena autna aona, oot eḁuad! ²⁰ Ante! Da od qeqalele daaṭem. Aun laa nug doya, od matuleb amu da lag oopa nopi, nug ele e laḁunih.

²¹ Danab laa nug ban eḁidḁu amu da nug daaḁunu elele api, nug da ele dahil dayak balalpa, anuḁa da ban eḁiṭi, gemu Mame ele nuhig dayak balalpa daaṭep amubia daagnih. ²² Danab nug daug ele dayeb amu nug nai Kayak Oudi Nug kristen tamaniak oh oopa nai mehuḁte imu doyaḁ!” awa aum.

4

DAYAKNU BALAL OḁAI HAB AṬANNU

¹ Keeke amu oh dimpa da neeḁe, hab abpa od matulak dayeye anidmi. Da baag tatam doomi ele amu baula biugal oqoṭi amubia dooyi amu aum. “Na inam bepe, da keeke

dimpa beku ele amu oh ipunidpi ante!” awa aum. ² Anam aawo amu pahanab Kayak Ouđinu gagatag dahilpa am ba he, da dayaknu balal okai hab atan dayom amu da am laa Nug amupa ele dayeye anidmi. ³ Nug beđu am men laa onig Jaspā, amu men laa onig konilian ele, amubia amahlom. Amahlele amu di apinak laa nug dayak aben amu talilitak men onig emerol bia anidmi. ⁴ Aria dayaknu balal 24 ag dayaknu balal okai, amu talilidna daaegeg, dayaknu balal okai amu, gamagpa dayom. Balal oh ag anam daaegeg amu iki danab 24 amu dayaknu balal 24 amupa daapig. Iki danab amu ag lamen ahilkad hakab ele, ag ikilagpa amu King igipanu bala golpa hak, amubia adalateg no, ag daapig. ⁵ Daaegeg amu dayaknu balal okai, amupanu amemđi dig ma amahala ugeke, haqad ele qeeqe, amahlak eblaih adit ele ag dayak balal amu noobpa eonna daapig. Amahlak amu ag am Kayak Ouđi, kobol ena oh am nuhigpa am bak daate ele amu, Nug ipunigte.

⁶ Aria dayaknu balal okai noobpa amu le ameg laa, nuhig antak am letod bia, opia awaknab, men onig kristal bia. Aria dayaknu balal talilitak amu hab daup dilag okai wadele, ag Kayaknu bauklel aoteb ele, ag idulagpa gomelagpa ele amelkad kudum ele, ag daapig. ⁷ Hab daup amu ag idulag pide pide. Laa idu am dođ laion idu bia, laa idu am makau idu bia, laa idu am danab idu bia, laa idu am ai web nađi, atan hagagadte, nug idu amubia. ⁸ Hab daup wadele, ag Kayaknu bauklel aoteb ele amu, ag oh haulkad eblaih laipu ele, ag haulag qadepa, waapa ele amelkad dodo kudum ele. Ag tuqan amun ele Nađi binag menana, inam aoteb. “Nađi Kayak Nug Gagatag Oh Ele, Nug opia awaknab, Nug opia awaknab. Anuka dayom, gemu daate,

Nug buti adi ele daaku.” Ag haen oh, hik awak iita, anam anana daateb. ⁹ Hab daup wadele, ag Kayaknu bauklele aoteb ele amu, ag Kayak, Nug hanhan bau daate, nuhignu oolag gamag ahaate. Ag oolag gamag ahehe, ag Nug oolag metan binag menana, “Ena heme,” aon aateb. ¹⁰ Ag anam heegeg, iki danab 24 amu ag laa, Nug dayaknu balalpa daate, Nug hanhan bau daate ele amu, ag Nug noobpa dup nona, gatelag qaun ona, Nug binag menana, ag ikilagpanu Kingnu bala bia amu maoeg uka, dayaknu balal okai, amu guguitak waawo, ag ahi inam edateb. ¹¹ “O Nadi, ihinig Kayak, Na keeke ohnab heme. Nahip doyakpaib na keeke oh he bepig. Gemu keeke amu oh nahip doyakpaib ele iiku daateb amunu danab ag oh nahipnu oolag gamag ahebeb, binan menana, nahip gagatag waapa daaglagnu amu na elele daatem.” Ag anam anana, ahi etaeggeg anidmi.

5

BUK AMU SIPSIP NAG ELE

¹ Laa Nug balal okaipa dayom ele amu Nug epeg nadiappa buk itodiak laa anidmi. Buk amu oopa dimugpa ele oh yak ele. Amu ag upuhpa eblaih adit batak qata qepig. Qata qak oh am gedaḍla ele. ² Am engel okai laa ele anidmi am nug baag okaipa aum. “Aun nug buk itodiak imu amu, nuhig qata qak eblaih adit imu tolatowa, buk imu uhuqkunu elele?” awa aum. ³ Aum amge hab atannu, wanpanu amu wan unuqagnu ele laipu laa nug qata qak eblaih adit amu tola, buk udug yak ele itodiak amu uhuqa oopa yak amu anidkunu laa ii anidpig. ⁴ Laipu laa nug buk amu uhuqa oopa yak amu anidkunu laa ii anidpig amunu da huanak gaami. ⁵ Anam gaaiyi, iki danab laa nug da amelpa aum. “Na aib gaame! Ante! Danab laa,

gagatag nuhig am laion bia, Nug Juda oopa beum, danab amu nug Dawit budubpanu, Nug ban editom amunu Nug buk itodiak upuhpa qata qak eblaih adit ele amu, Nug amu tola uhuqkunu elele,” awa aum.

⁶ Anam aum amu da Sipsip Nag laa, Nug dayaknu bala okai amu hab daup wadele, ag Kayaknu bauklel aoteb ele amu, ag noolagpa hibaita dayeye, iki danab ag amu oh taliliadna daaegeg anidmi. Sipsip Nag amu ag qeeg mauha, edua hibaite anidmi. Nug qeqedi eblaih adit ele amu ameg eblaih adit ele. Ameg eblaih adit amuam Kayak Oudi, kobol ena oh am nuhigpa am bak daate ele, amu ipunigte amu Kayak Nug me, wan ohpa ukom. ⁷ Aria Sipsip Nag amu Nug uka, Kayak Nug dayak balal okai pa epeg nadiappa buk itodiak yak ele amu ada dayeye, Nug adita awom. ⁸ Nug buk itodiak yak ele amu awe, hab daup wadele, ag Kayaknu bauklel aoteb ele amu, aria iki danab 24 ele ag Sipsip Nag noobpa dup nopig. Iki danab oh ag am musik laa, gita bia, aben aben adaladnana, ag tapid golpa hatak, keeke laa kalu mutudig ena ele tapidpa am bak ele, amu eonna, mutudig oegeg adaladna daapig. Keeke amu Kayaknu danab ah wanpa unuqitegeg, Kayak doote amu. ⁹ Ag ahi baula inam edapig. “Na nai yak amu aonna, qata qak oh pagukutnu elele. Adinu? Ag heeg, na mauhme amu na danab budub ohpan, nai ohpan, danab diigdiig ohpan amu wan ohpan ele, na tiinpa danab daden mena, Kayak metame. ¹⁰ Na he, ag king amu mana metak danab ele daateb. Ag Kayak udat hekulagnu amu wan ele gumaglagnu daateb.” Ag anam anana, ahi edapig.

¹¹ Aria da baula neeke, daul hume, engel tausen kudumnab amu milion kudumnab ele ag dayak balal

okai taliliadna hipaidna, hab daup wadele, ag Kayaknu bauklel aoteb ele amu, iki danab ag ele oo metan talilidna daaegeg, baalag doyen anadmi. ¹² Daanna ag ahi inam qalan edapig. “Sipsip Nag, ag anuka qeeg mauhom ele, Nug am onig okai, keeke oh ena, doyak ena, gagaṭag huana ele aokunu elele. Danab oh Nug onig okai metaglagnu, binag mekulagnu, ‘Ena ha mekom,’ ele aon akulagnu elele!” anana edapig.

¹³ Ag anam etaeg, da keeke oh Kayak Nug hatom, amu dilag nai ele doomi. Keeke hab atan daateb, wanpa daateb wan unuqag daateb amu yupa daateb ele, amu oh ag enan inam apig. “Kayak Nug dayak balal okaiṭa dayeye, Sipsip Nag ele daate amu binalah, onilah, amahalak amu gagaṭag ele ahilahpa hanhan dayad!” aon apig. ¹⁴ Aria hab daup wadele, ag Kayaknu bauklel aoteb ele amu, ag am, “Imu am genab,” aeggeg, iki danab ag Kayak amu Nug beka Jesus ele binalah mepig.

6

BUK ITODIAKNU QATA QAK TOLAKNU NAI

¹ Keeke amu oh dimpa da Sipsip Nag nug buk itodiak qata qak eblaih adit ele amu, Nug qata qak namba wan amu dig ma tole anidmi. Tole amu da hab daup wadele, ag Kayaknu bauklel aoteb ele amu, ag oolagpanu laipu laa nug haḡad oqoti biapa inam a doomi. “Na do!” ² Nug anam a, da neeki uke, hos haḡab laa anidmi. Laa nug hos atan dayom ele amu nug lat ele adom. Nug king igipanu bala awom. Nug ban edadkunu elele amunu nug ban kudumnab edadkunu ukom.

³ Uke amu Sipsip Nag Nug qata qak namba tu aaku tolom. Tole amu da hab daup wadele, ag Kayaknu bauklel

aoteb ele amu, ag oolagpanu laa inam a doomi. “Na do!”
⁴ Da dooi amu hos kokod̄ doum. Laa nug hos amu atan̄ dayom. Ag danab hos amupa dayom ele amu, ag nug gagatag, gagatag amupa nug wanpa danab oh dilagpanu madod̄ kobol amu edua aweb, ag aka danab ah laa aqapeg mauhkulaḡnu, gagatag amu medapig. Amunu nug udat̄ amu hekunu qep okai elab medapig.

⁵ Metaeg amu Sipsip Nag Nug qata qak namba tri amu tolom. Tole amu hab daup wadele, ag Kayaknu bauklel aoteb ele amu, ag oolagpa laa nug inam a doomi. “Na do!” Nug anam a amu da neeki uke, hos hinqak anidmi. Nuhig gumak danab, hos amu atan̄ dayom amu, nug epegpa ug epediaknu keeke ele adom. ⁶ Hab daup wadele, ag Kayaknu bauklel aoteb ele amu, ag oolagpa baag laa oqoti inam ba a doomi. “Enug haen gagatag daate amunu na ded̄ laipun udatnu nob amunu na danab wit aeg wa nakok laipu aakuib mete. O iita bali aeg am wa nakok ewam aakuib mete! Amge na goden, grep lepu ele aib hepe nauhom. Nug tatam dayom anamib dayad̄!” awa aum.

⁷ Anam aawo, aria Sipsip Nag qata qak namba po amu tolom. Tole amu hab daup wadele, ag Kayaknu bauklel aoteb ele amu, ag oolagpa laa nug inam a doomi, “Na do!”
⁸ A amu da neeke, hos laa, nuhig bedu antak am lan kuhak bia, amu anidmi. Aniti amu danab hos atan̄ dayom, nug onig Mauhak. Hades nug nug dim lamite dopid̄. A danab oh ameg wadele batak anam opatya, a ameg laipu qep elabpa, enugpa, ode diigdiigpa amu dod̄ dakud̄ odelagpa heped̄ mauhkulaḡnu gagatag aopid̄.

⁹ Amu Sipsip Nag Nug buk itodiak qata qak namba paip amu tolom. Tole amu qadab waapa danab ah Kayak nainu

oolagpa genab doona, nuhig nai ele mehuqpig amunu aqaeg mauhpig ele amu, ag dotolag anadmi. ¹⁰ Anatiti, ag baalag okaipa enana apig. “Kayak, na adi hekutnu atem amu na aaku hetem, na am opia awak ele. Kayak, na haen ganab danab wanpa daateb, ag ig na ii uuitut, iqaeg mauhmut ele amu, na haen ganab ag hepig amunu ig tiinignu nob ahilagpa edukut?” aon apig. ¹¹ Ag anam aeg amu Nug mauhak dotolag amu oh lamen hakab madata, amelagpa ag nakok laa ele hik aon daapeg, danab nau ag ag aqaeg mauhpig bia, ag mauhak dotolag udat laipu, ag lailkad awalkad ele wanpanu amu, danab nau ag ahilagpa anamib aqapeg mauhpeg, dimpa ahilag eb qak elele dayeb amu Kayak Nug ag oh tiilagnu nob edukunu aum.

¹² Kayak Nug anam he amu Sipsip Nag Nug buk itodiakpa qata qak namba siks amu tolom anidmi. Tole, mim okai wanpa ne anidmi. Aam nug pehetak ii amahale, wan gatatu manom. Gatatu mane amu kalam nug kokod, tiig bia, dayom. ¹³ Dayeye amu hodopai ag habpanu ad meulkad haenpa lep ii meeg, ulah huanak he, kaolna nena qeteb, amubia wanpa nena qepig. ¹⁴ Nena qeeg, hab ele hedig itodieg uke, qena meteb amubia itodia ukom. Ugeke, qauko oh amu nud oh ele ag abenlag uuna, kautna laih wapig.

¹⁵ Waaegeg, wanpanu king, danab okai okai, ban iki, danab enulag ele, danab gagatag ebehilag ele, begbeg danab amu danab laa oh begbeg iita, ag oh qaukopanu men odepa amu men gidodlagpa gona lokumadpig. ¹⁶ Lokumna daanna, ag qauko men ele dilag apig. “Laa nug dayaknu balal okaipa daate ele, Nug amegnu

lōkukmignana amu Sipsip Nag, Nug danab ah dilag hipuninnu opōdi bak doōte ele amu, ag opōdi bak amunu ele lōkumignana tonikeg! ¹⁷ Adinu? Ded nadi, amuam a danab ah hipunin ahilagnu bu aqaglahnu ded, ded amu aaku beum daate. Aun nug gagatag dayaya, haen nadi amu edidku? Auntai laa iita!” aon apig.

7

ISRAEL KUDUMNAB, 144,000, *KAYAKNU EPONAK KEEKE AOPIG*

¹ Da keeke amu antoya, da imu ele anidmi. Da engel wadele laa, ag wan daug laih laih wadele amupa hipaidna, ulah wadele amu ipulag aben abenpa udipeg, yupa ulah daamanu, wanpa ulah daamanu, ad amu keeke laala oh ulah aomnanu ipulag oo nekulagnu daanna, oo nepig. ² Oo neegeg amu engel laa, nug Kayaknu eponak keeke awom ele, nug laih aam bedepanu beebe anidmi. Nug baag okaipa engel wadele, ag wan yu ele hepeg nauhkunu gagatag aopig ele amu, nug ag onilagpa ewa, inam aum. ³ “Ag wan, yu, ad amu keeke laa oh paha aib aqapig. Ig Kayaknu udat danab amu ag idulagpa eponak keeke amu meput, ag udat ahilag heig!” awa aum. ⁴ Nug anam a amu da Israel oopa, danab ah ag Kayaknu eponak keeke aopig ele amu, da ahilag eb qak doomi. Amuam kudumnab (144,000) doomi. Amu Israel budub ab iki aben abenpanu laala Kayaknu daupnu eponak keeke aopig. ⁵ Juda budubpanu amu 12,000, Ruben budubpanu 12,000, Gad budubpanu 12,000, ⁶ Aser budubpanu 12,000, Naptali budubpanu 12,000, Manase budubpanu 12,000, ⁷ Simion budubpanu 12,000, Lewi budubpanu 12,000, Isaka

budubpanu 12,000, ⁸ Seblon budubpanu 12,000, Josep budubpanu 12,000, Benyamin budubpanu ele 12,000.

⁹ Imu oh dimpa da baula neeke, danab ah kudumnab qag mena daaegeg anadmi. Aun laa nug danab ah amu oh eb aqakunu elele? Iita! Elele iita! Danab ah amu ag budub ohpanu, wan atu ohpanu, bedulag idu idunu amu nai ohpanu ele, ag Sipsip Nag amu Kayak, Nug dayaknu balal okaipa daate ele amu, a noolahpa hipaidna daapig. Ag lamen hakab mena, ad onig pam amu udug epelagpa adualadna daapig. ¹⁰ Ag baalag okaipa ena apig. “Edua awikaknu diig am ihinig Kayak, Jesus ele. Kayak Nug nuhig dayaknu abenpa daate,” aon apig. ¹¹ Engel oh anuqak dayak abenpa talilidna daaegeg amu iki danab, hab daup wadele, ag Kayaknu bauklel aoteb ele amu, ag oh dayaknu balal okai noobpa dup nona, Kayak binag mepig.

¹² Ag binag mena apig. “Genab! Kayaknu hak ena nuhigpa hanhan iita ii mema, ig Nug binag amu onig okai ele mekunig. Ig Nug amegpa, ‘Ena heme,’ akunig. Nug amu doyak, gagaṭag amu ebehi ele! Genab!” aon apig. ¹³ Aon aeg amu iki danab laa od medom. “Lamen hakab mepig imu amu ag am aun adi? Ag adepanu udipig?” awa od medom. ¹⁴ Od mede, da nuhig od mak nob mein ami. “Nadi dahil, na dootem,” awe ami. Ai amu nug da amelpa aum. “Danab imu ag kekedpa ug okainab maopig, guitak ele doopig amge ag Kayak di ii medapig. Ag lamen ahilkad Sipsip Nag tiigpa ihalateg hakab ebapig. ¹⁵ Amunu ag dayaknu balal okai noobpa hipaidna daateb. Ag Nug laug oopa tuqan amun ele nuhig udat henan daateb. Laa Nug dayak balal okaipa hedep neum daate ele amu, Nug nuhig

ehaniṭak ena, amupa atog noadku¹⁶ amunu ag geḥa baula enug ii aqama, le ele baalag ii diima. Aamnu gaḱadak ii aqama, gaḱadak laala ele ii aomna.¹⁷ Adinu? Sipsip Nag, Nug dayak aben okai gamagpanab daate amu, Nug ahilag gumak danab ena dayaya, geḥa gumatebeb gona, mod laapa, le qepudia bete ele, amupa ag bauklele le aoglag. Amu Kayak nug geḥa amelag leb oh amelagpanu obiku,” awa aum.

8

SIPSIP NAG QATA QAK NAMBA SEWEN TOLOM

¹ Aria sipsip nag buk itodiak qata qak namba sewen amu tolom. Tole amu hab atannu keeke oh to etak, oqoti iita, nakok haen elab, aua maha, anam dayom. ² Dimpa da engel eblaih adit, Kayak noobpa hipaidna daateb ele amu, ag anadmi. Nug ag biugal eblaih adit matom.

³ Engel laa ele nug kalu mutudig ena elenu gol tapid ada doa, qadab noobpa dayom. Dayeye, ag kalu, mutudig ena ele amu, okai medapig. Nug kalu mutudig ena ele amu Kayaknu opia awak danab dilag unuqitak ele, keeke adit amu oh gol qadab, amu dayaknu balal okai noobpa daate, qadab amupa keeke adit amu mana, Kayak medakunu dayom. ⁴ Mana medete amu kalu mutudig ena ele amunu kahug, mutudig ele amu, Kayaknu opia awak danab dilag unuqitak ele, engel epegpanu Kayak topa teum. ⁵ Te amu engel nug tapid awa, qadabpa ab adu ite, am be, budie uka, wanpa noum. Anam he amu hakaq qe, oqoti diigdiig o, amemdi awewe, wanpa ele mim neum. ⁶ Mim ne, engel eblaih adit ele amu biugal iwalkulag nu bapaidpig.

⁷ Engel namba wan amu nuhig biugal iwale, ais amu ab adu tiig ele kaboliak daaiya, wanpa nena qepig. Nena qena

heeg, wan maha laipu oh nauhom, ad maha amu oopa oh bunadom, gikidah ele maha amu oopa oh bunadom amge wan maha adit laa amu ena daapid.

⁸ Ena daekeh amu engel namba tu nug biugal nuhig iwale amu laa qauko ab adu ele bia budie uka, yupa noum. No amu yu laih laipu amu tiilag eduom, laih adit amu ena daapid. ⁹ Keeke oh yupa daateb ele amu ameg laipu amu mauhpig, ameg adit amu bau daapig. Yupan ub oh amu ameg laipu amu nauhpig, adit am ena daapig.

¹⁰ Aria engel namba tri nug biugal nuhig iwale amu hodopai okai laa, hul didite bia ewawa, habpanu auta na qeum. Le okai okai amu le odepanu doteb ele, amunu ameg laipupa na qe, adit laapa am iita. ¹¹ Hodopai amu onig Mua. Le ameg laipu oh amu mua ele bepig. Beeg amu danab kudum ag le amu laeg, oolag ewe, mauhadpig.

¹² Aria engel namba po nug nuhig biugal iwale amu laa he, aam, kalam, hodopai ele amu amahlak ahilag huanak amu iita me, amun tuqan ele nakokib eopig.

¹³ Amu da web nadi laa hab waapa, aben gamagpa hagagada ugeke anidmi. Nug baag okaipa ewa aum. “Gadon, gadon, gadonnab! Engel ewam biugal ii iwalpig, geha iwalkulagnu daateb amunu danab ah wanpa daateb amu ug okainab dooglag!” awa aawo doomi.

9

ENGEL NAMBA PAIP NUG NUHIG BIUGAL IWALOM

¹ Da engel namba paip nug biugal nuhig iwale amu hodopai laa habpanu wanpa na qe anidmi. Aniti amu laa mod ode umanab, batak iita ele, amunu ki metom. ² Nug mod amu matule amu modpanu kahug okainab, ab kahug

oḱainab beṭe, amubia beum. Kahug amu ba, aam ameg hab ele tonate, gatatu manom. ³ Gatatu mane amu tap oḱai, ag ab kahugpanu bena, wanpa nepig. Wanpa neeg amu laa wanpanu apiap dilag gagatag amubia gagatag maṭom. ⁴ Gagatag maṭowa, ag ad, gikiḁah amu wan etetuab laa oh ele ii aqamnanu aum. Nug inam aum. “Ag danab ah oolagpa oina, laa ag iḁulagpa Kayaknu eponak keeke iṭa ele amu, aakuib guiṭak maṭeg! ⁵ Ag danab ah aib aqapeg mauhpig. Ag kalam tanig ele aakuib guiṭak maṭeg!” awa aum. Anam a amu tap ag danab ah guiṭak naunab, apiap danab emalaṭe guiṭak doṭeb amubia guiṭak madapig. ⁶ Haen amupa danab ag mauhḱulagnu ib matiglag amge ii mauhmana. Ao, ag mauhḱulagnu oolag huanak daaḱu amge mauhak nug ag uuaṭa, umanab daaḱu. Ag paha mauhak ii anidmana.

⁷ Aria da tap anadmi amu ag hos ban heḱulagnu daṭeb amubia anadmi. Ag iḱilagpa amu king igipanu bala golpa hak ele, amubia dayom. Ag iḁulag amu danab iḁulag bia. ⁸ Iḱilag uḁug amu ah iḱilag uḁug elab amubia, aelag amu laion aeg bia. ⁹ Ag momolagpa amu keeke qahad aenpa hak bia ele, haulag amu karis kuḁum hos eedadna banpa uḱaegeg oqoṭi oṭeb, amubia oqoṭi opig. ¹⁰ Ag am apiap bia boolag ele, amu apiap bia ele ag boolag nob amu aeg hawad ele dayom, amupa danab ah guiṭak kalam tanig ele maṭaglagnu elele daapig. ¹¹ Ag ahilag king ele, nug haen oh ag gumadṭe. Nug am mod ode, batac iṭa ele, amunu oḱai. Hibru naipa amu nug onig am Abadon. Grik naipa amu nug onig am Apolian. Amu diig am, ‘keeke oh he nauhaknu danab.’

¹² Gadonnab, ug oḱainab amu aaku beum amge aḁit baula ele beḱulahnu daṭep.

¹³ Aria engel namba siks amu nug nuhig biugal iwale amu da qadab, golpa hak, Kayak noobpa daate ele, amu daug wadelepanu baag laa doomi. ¹⁴ Baag amu engel namba siks biugal ele amu amegpa aum. “Hab daup wadele Yupretis lepa qakalatak daateb amu diin uhuqate!” awa aum. ¹⁵ Awa a amu nug engel wadele, ag aua, ded, kalam, maḍ amupanab danab ah oh ameg ewam oolagpa amu ameg laipu aqaglagnu gagatag aopig ele amu, nug ag uhuqatom. ¹⁶ Amu daup wadele amu waalagpa ban danab hospa daapig ele am kuḍumnab (200 milion). Da ahilag eb qak doomi.

¹⁷ Da tuleglegpa hos amu danab hospa daapig amu ele anadmi, ahilag ban bala amu inam. Danab ag momolagpanu qahad am aenib. Qahadnu bala amu kokod, ed hinqak bia amu lanlan ele. Hos ikilkad amu laion iki bia. Amu ab aḍu, kahug, keeke laa onig salpa ele, ag odelagpau ewawa ba ukom. ¹⁸ Daup amu wanpan danab ah keeke nau ewam, ab, kahug, amu salpa ele, hos odelagpanu uḍiom ele, amupa ag danab ah ag ameg ewam daaegeg, ameg laipu aqaeg mauhpig. ¹⁹ Hos dilag gagatag amu ag odelagpa am boolagpa ele dayom. Ag boolag amu makai bia iki ele, ag danab amupa guiṭak madateb.

²⁰ Danab laa oh, daup amu ag keeke nau amupa ii aqaeg mauhpig ele amu, ag epelagpa keeke laala hadpig amu ag ii uupig. Ag kayak ham bupuak golpa, silwapa, braspa, menpa amu adpa ele hadpig amu, ag binalag mekulagnu ii uupig. Kayak ham bupuak amu ag ii neegteb, ag nai ii dooteb, amu ag ele oiglagnu elele iita. Aria ag ouḍi nau binalag mak kobol ahilag ele ii uupig. ²¹ Danab amu ag danab laala aqaeg mauhegeg, onilag aonna, gapai kobol

henana, keeke mauhnoak yab ele aopig amge ag oolag ii eduom, kobol amu ele di ii medapig.

10

ENGEL AM BUK ITODIAK NAKOK ELE

¹ Keeke amu ba male, nakok dimpa amu da engel laa, nug nuhig gagaṭag okai ele, nug hab aṭannu neene anidmi. Nug beḍu lombig hautak, di apinak igipa taliliak ele. Nug iḍu amu aamnu amahlak bia, nug baeg amu lag keeke ewa male, biidod nuḱa ewawa dayeye anidtem, amubia. ² Nug buk itodiak nakok amu uhuqak ele epegpa dayom. Dayeye amu nug baeg naḍiap amu hiḱaḱa, yu qaḱepa tapowa, naneh amu wan qaḱepa tapa, ³ nug laionnu gayak bia baag okai pa eum. Nug anam e amu haḱaḱ eblaih aḱit amu oqoti opig. ⁴ Haḱaḱ eblaih aḱit amu oqoti onana, nai apig amu da yaakulnu hemi amge hab aṭannu baag laa haḱaḱ eblaih aḱit oqoti opignu amu inam a doomi. “Na haḱaḱ eblaih aḱit ele oqoti opig amunu amu dab makpaib aḱe, aib yaame!” awa aum.

⁵ Anam aawo amu engel, nuhig gagaṭag okai ele, nug yu qaḱepa ele hibaita dayeye anidmi, nug epeg naḍiap hab aṭan humama, ⁶ nug laa bauklel hanhan daate ele, Nug hab heum amu habnu keeke oh ele haṭom, Nug wan heum amu wanpanu keeke oh ele haṭom, Nug yu heum amu yupanu keeke oh haṭom niiteb ele amu, Nug onigpa nai nuhig gagaṭag qeṭa aum. “Haen baula ii tuḱidma. ⁷ Iiṭa, engel namba sewen nug biugal iwaleb amu, Kayaknu nai lokumak niiom, Nug nuhig uḱat danab, propet aḱi, ag amelagpa aum ele amu, gemu nai amuam meu okunab,” awa aum.

⁸ Anam a amu da baag laa tatam doomi ele amu baula hab a_tannu da amelpa nai ma_tieye doomi. Nug aum. “Na wana, buk itodiak nakok, uhuqom ele amu, na engel nug wan yu ele tapatom daate amu, na nug epegpanu awe!” awa aum. ⁹ Awa a amu da wain, engel nug buk itodiak nakok, uhuqak ele a_dom amu medakunu amegpa ami. Ai amu nug da amelpa aum. “Aon laa! Na ootpa amu mua ob dookut amge na odenpa amu upuh lepu bia ubuhi ob dookut,” awa aum. ¹⁰ Nug anam a amu da buk itodiak uhuqak ele engel epegpanu a_dite lami. Odelpa amu upuh lepu bia ubuhi oum amge da lain malai amu da batamalpa amu mua oum. ¹¹ Mua o amu nug da amelpa aum. “Na baula e_dun, Kayak nai keeke geha beku amunu danab ah atu atu oh dilagpa, ag nailag diigdiigpa, king kudum dilagpa ele mehuqe!” awa aum.

11

KAYAKNU NAI AWA UKA MATIAKNU DANAB ADIT

¹ Aria amu dimpa ag melemel maknu ho_kat, dud qa oiyaknu qaitob_tob bia medapig. Medaeg amu baag laa aum. “Na ahan, Kayak laug amu qadab ele melemel maate! Danab ah apa me_tid anid_teb ele amu, na ag ele eb aqe! ² Na a_d, Kayak laug dimitim daate, i_ita a_di ag agupa oi_teb amu, na amupa aib melemel meme. A_dinu? Laa ag anam he_kulagnu gagatag ma_tom amunu i_ita a_di ag Jerusalem amu kalam 42 ug me_taglag. ³ Ug medappeg, da a_pi, dahil propet a_dit, a lamen qat_i hediag ele, anuka propet ag anam takadpig bia takaya, de_d kudumnab, 1,260, a nai mehuqkulah,” awa aum. ⁴ Ad olip a_dit amu lam a_dit ele, a wan ohnu Na_di noobpa daatep ele amu, a danab

adit imu ipunigtep. ⁵ Laala ag a ehed hatkūlagnu hepeg amu ab adu odelahpanu doa, ahilah keked ewadku. Ao, genab, danab nug ehed hatkūnu heeb amu a ib anampa qeped mauhku. ⁶ A nai mehuqyaya, a gu ii nemanu, hab qakaglahnu, le oh edun tiig bia daaglagnu, keeke nau kudum wanpanu danab ah aqaglagnu ele hekulahnu dootep. A oolah haen kudumtai oo iita haen laipu laipuib hekulahnu anam dayeb amu a aaku hekulah.

⁷ A Kayak nai mehuqya malaped amu dod dakud, nug mod ode, badak iita elepanu bete ele amu, nug beeb, a ele ban hekulag. Ag henana, nug aqateb mauhkulah. ⁸ Mauhpēd amu a gadalah amu ab okainu ib ode okaiipa niiku. Ab amu nai tonak laalapa ag Sodom, Igipta ele ateb. Ab amupa ag ahilah Naḏi ad emaitakpa atulpig. ⁹ Amu ded ewam, maha laa ele amu danab budub ohpanu, wan atu ohpanu, bedulag idu idunu amu nai ohpanu ag gadalah anidna, ag ahilahnu oo aeg baknab doona, ag boomatkulagnu uuglag. ¹⁰ Danab wanpa daateb ele amu a mauhpīdnu, “Ena,” anana, ag oolag gamag ahebeb, do keeke nug metaglag. Adinu? Propet adit a danab ah wanpa daateb ele amu, ag oolag edukunu guitak huanak bia madapid.

¹¹ Aria ded ewam maha laa ele amu uue amu Kayak Nug he, bau edua a bedulahpa no, a eduya hipapid. Danab ah ag a anatna, ag huanak badapig. ¹² Mehuqak danab adit amu a hab atannu baag laa nug baag okaiipa inam ewa a doopid. “A atan ipa beid!” Ana male amu a lombigpa hab atan tepid. Teeheh, ahilag keked amu ag a teeheh anatpig.

¹³ A anam teeheh, haen amupaib mim okai laa ne, ab okai amupa lag obatak ten ten daaegeg, obatak anen anen

amu oolagpa lag laipu laipu nauhpig. Amu danab 7,000 mim amupa mauhpig. Laa oh bau daapig ele amu huanak badapig. Badana Kayak binag mepig. ¹⁴ Amu engel nug tatam keeke ehednabnu gadon a, ewam batom amu, gadon amu oolagpa gadon adit amu aaku beya malapid. Amge doyeg! Haen nakoknab laa ele amu gadon nam ba tri amu aaku beku.

ENGEL NAMBA SEWEN NUG BIUGAL IWALOM

¹⁵ Aria engel namba sewen nug biugal iwale amu hab atan apa ag baalag okaipa inam apig. “Wan ohpan gumak udat aaku edua, Kayak, Jesus ele epelahpa daate. Kayak Nug hanhan udat amu heku.” aon apig. ¹⁶ Anam aeg amu iki danab 24 ag dayaknu balal okai talilidna, balal ahilkadpa daateb ele amu, ag dup nona, Kayak binag mepig. ¹⁷ Binag menana apig. “O Nadi, na Kayak gagatag, ebehin oh ele. Na gemu daatem, anuka daadme. Na aaku gagatag okai nahip oh edun aon, King daatem. Amunu amu ig na binan metem. ¹⁸ Iita adi ag nahipnu opodilag beum. Adinu? Na danab ah hipunin heteb ele amu, na ag amunu bu aqakutnu haen aaku beum amu na gemu mauhak adi epediadkutnu haen ele aaku beum. Gemu am ele nahip udat danab nob ena madaikutnu haen. Amu propet, nahipad danab ah amu danab oh ag nahipnu enanag doon, oolag otaita ele amu, na ag ele nob ena madaikutnu haen. Na danab amu ag onilag ele, onilag iita ele, amu ag oh nob ena madaikut. Aria gemu ele amu na danab ag wanpa tape nak hena, wan heeg nauhte ele amu, na hepe, ag nauhkulagnu haen,” aon apig.

¹⁹ Ag anam anana, binag mepig. Binag meeg amu Kayak laug, hab atan daate ele amu, nug od matule, tituanak

nainu kunup amu miag atiom. Miag atie amu amemdi awewe, oqoti oowo, hakaḁ qeeqe, wanpa mim neene, ais gu ele neum.

12

AH LAA MAKAI ELE

¹ Eponak keeke okai laa hab atan beum amu inam. Ah laa aamnu amahlak, lamen hakaḁ bia laaya dayeye, kalam nug baeg waapa dayom. Nug igipa amu king igipanu keeke amunu hodopai 12 ele meum. ² Nug oo ele daya, nid aokunu heeche, beḁu guite, huanak aiqakom. ³ Aiqageke amu eponak keeke laa hab atan beum amu inam. Mat nadi kokod, nug iki eblaih adit ele, qeqedi amu eblaih laih ele. Nug ikiudpa king igipanu bala, onig kraun, amu eblaih adit ele dayom. ⁴ Nug boobpa hodopai habpanu ameg laipu amu oh tataḁe, wanpa nena qeegeg, ameg aditnu amu daapig. Daaegeg amu mat amu nug ah nid aokunu heum ele amu, noobpa hibaita, ah nid aweb lakunu meita dayom. ⁵ Dayeye amu ah amu nug nid danab menuom. Nug hokat aenpa hak ele, Nug hokat amupa danab ah atog noadku amu, Nug atu atu oh ikilag daakunu menuom. Menue amu laa pahanab awa Kayak topa nuhig dayak balalpa meum. ⁶ Meum amu ah nug oola, atu danab ii daatebpa, Kayak Nug nuhignu babaitom, amupa ag ded 1,260, atog nonana, e medapeg lanana daakunu ukom.

⁷ Uke amu ban okai hab atan neum. Engel okai, onig Maikel, nug nuhikud engel ele, ag mat nadi, nuhikud daup ele nug qepig. ⁸ Nug qenana, mat amu nuhikud daup ele ag ban edidkulagnu gagatag iita amunu ag hab atan daaglagnu elele iita. ⁹ Amunu Kayaknu engel ag nug

maoeg wanpa noum. Mat okai amu nug anukanu, nug onig laa am Satan, onig laa am Dewil. Nug wanpanu danab ah oh ham bupualadte ele. Ag nug maoeg wanpa noum, nuhikud daup oh ele budiateg, wanpa nopig. ¹⁰ Budiateg noeg amu da hab atan apa baag oqoti okai laa inam aawo doomi. “Gemu ihinig Kayak Nug edua awikom. Nug king daakunu gagatag ele amu, Nug ig ipunikom. Nug Beka Kristus, Nug iki daakunu ele aaku ipunikom. Adinu? Danab nug ig lainkad amun tuqan ele Kayak noobpa hetodiakpa maadtom ele amu hab daup ag aaku nug maoeg wanpa noum. ¹¹ Ig lainkad ag Sipsip Nag tiigpa amu nai genab mehuqtebpa ele gagatag aon, ban edidna, keked lamadpig. Ag wanpa enaib daaglagnu amu ii dab mepig. Iita, ag bedulag maoeg uke, udat hekulagnu aakuib dab mepig. ¹² Amunu hab amu hab atan daateb ele, ag oolag gamag ahad! Amge wan amu yu ele a dab meid! Ahilagpa ug okai aaku bekunu hete. Adinu? Mat okai onig Satan, nug aaku ahilagpa noum. Nug opodi bak huana ele. Adinu? Nug doote, nuhig haen tutu.” awa aum.

¹³ Bag anam awa a, mat okai, ag nug maoeg wanpa neum, nug amu doya, nug ah nid danab awom ele amu lamitom. ¹⁴ Amge Kayak Nug ai web haug adit ele ah amu nug hagagada, mat nadi uuita, umanab aben danab ii daatebpa, laa nug ah amunu babaitom daate ele amu, apa ukeb, mad ewam kalam siks ele e metaglagnu gokunu metom. ¹⁵ Mete, mat amu nug odepanu le okai keleb, ui bia ugaka, ah amu aokunu heum ¹⁶ amge wan nug ah ehanita, nug ode aahe, le mat odepanu amu wan oopa ukom. ¹⁷⁻¹⁸ Anam daye amu mat okai nug opodi huana be, danab ah ag Kayaknu do dim lamidnana, nuhignu nai

mehuqnana, Jesus dim lamidteb ele amu, nug ag ele ban hekulagnu ukom. Mat amu nug uka yu ihipa dayom.

13

DOD DAKUD ADIT

¹ Dayeye amu da dod dakud laa qeqedi eblaih laih ele, iki eblaih adit ele, nug qeqediudpa King igipanu bala amunu eblaih laih ele. Nug ikiudpa amu onilag laala yak ele. Onilag amuam Kayaknu wan yak nai laala yaalatak ele. ² Dod dakud anidmi ele amuam dod laa onig leped bia, nug baeg amu be baeg bia, nug ode amu laion ode bia. Mat okai amu nug nuhig gagatag dod dakud amu metom. Nuhig balal, nug nug bia King daakunu, gagatag okai ele daakunu onig metom. ³ Dod dakud amu nug iki laipupa amu mauhaknu ihi ele amge iki amupanu ihi amu qada eta, ena dayom. Ena daye, wanpanu danab oh anidna, otaina, dim lamidpig. ⁴ Mat amu nug dod dakud ehanitom amunu danab ag mat okai amu binag menana, dod dakud amu ele binag menana, inam aka aka nug od medapig. “Aun nug dod dakud imubia? Aun nug nug ele ban hekulahnu elele?” aon apig.

⁵ Kayak Nug dod dakudnu, “Nug ehed hekunu oo dayeb amu uuput had!” aum amunu dod dakud nug mutub qaaqa, Kayak amu nuhig keeke oh ele dabaata, awa awa aqatom. Nug keeke amu hekunu, laa nug gagatag kalam 42 batak aakuib daakunu metom. ⁶ Nug ode aaha, Kayak dabiata, awa awa qeta, Kayak onignu dabiata, awa awa qeta, Kayak apagnu ele dabiata, awa awa qeta, amu nug Kayaknu daup, hab atan daateb ele amu, nug amu dilag ele dabaata, awa awa aqatom. ⁷ Nug anam heeche, Kayak Nug nuhignu, “Nug ehed hekunu oo dayeb amu uuput had!” awa aum

amunu nug ban dig me, Kayaknu danab ah amu ele ban hena, nug ag edata, tabate nopig. Noeg, nug danab ah amu ag budub ohpanu, wan atu ohpanu, bedulag idu idunu amu nai ohpanu ele dilag King daakunu gagatag awom. ⁸ Danab ag wanpa daateb ele amu, ag oh nug noobpa dup nona, binag menana, unuqidkulag. Yo danab ah oh amu ag onilag Sipsip Nag mauhom ele amu nuhig buk laa, onig bauklel awa onig yaknu buk, buk amupa ii yak amu ag oh dod dakud amu binag mekulag. Sipsip Nag mauhom ele amu, Kayak Nug anukanab, wan ii dayak haenpa, Nug anam mauhkunu dab meum. ⁹ Danab nug daug ele dayeb amu nug nai imu atog noa doya! ¹⁰ Am aun nug mani guitakpa gokunu dayeb amu apa goku. Laa nug qeppa mauhkunu dayeb amu nug qeppa mauhku. Kobol amuam Kayaknu danab ah ag gagatag daaglagnu, ag ahilag oopa genab doyak gagatag adaglagnu ele ipunigte.

¹¹ Aria da baula dod dakud laa wan oopanu beebe anidmi. Nug am qeqedi adit ele, qeqedi amuam sipsip nag qeqedi bia, amge nug mat bia nai matiom. ¹² Dod dakud wanpanu beum ele amu, nug dod dakud tatamnu amu nuhig gagatag oh awom. Awa, nug dod dakud tatamnu amu nug abenab awa, nuhig gagatagpa udat heum. Nug he, wanpan danab ah oh ele ag dod dakud tatamnu, nug anuka igipa mauhkunu ihi beum amge qada etom ele amu, nug binag mepig. ¹³ Dod dakud gehanu amu nug eponak keeke, danab hekunu elele iita, okai okai heum. Udat laa amu inam. Nug danab ah noolagpa he, ab adu hab atannu wanpa neum. ¹⁴ Kayak nug dod dakud geha ahom ele amu, nuhignu, “Nug ehed hekunu oo dayeb amu uuput had!” aum amunu nug udat diigdiig amu,

amupa dod dakud tatamnu amu ehanita heum. Kobol amupa wanpanu danab ah ham bupualatom. Nug danab amelagpa inam aum. “Ag dod dakud anuka qeppa yak amge ii mauhom amu nug dotog hoina, binag meig!” awa aum. ¹⁵ Nug anam a, Kayak Nug dod dakud geha ahom, nuhignu, “Nug ehed hekunu oo dayeb amu uuput had!” aum amunu nug dod dakud dotog amu oudi metom. Mete amu dotog amu nai madikunu amu laa nug dod dakud dotog nug binag ii meeb amu nug danab amu qeeb mauhkunu elele dayom. ¹⁶ Aria dod dakud gehanu amu nug a, ag eponak keeke laa danab ah oh, danab hamu amu danab onilag ele, danab enulag ele, danab dadek ele, danab hamu daateb amu begbeg danab ele, ag danab ah amu oh epelag nadiappa o idulagpa mepig. ¹⁷ Anam dayom amu aun laa nug eponak keeke dod dakud onig o nug onignu leta eb qak amu nuhigpa ii dayom amu danab amu nug danab dilagpa keeke ii daden meum. Ag ele nuhigpa keeke ii daden mepig. ¹⁸ Keeke imu am dab mak tutuku aognignu ate. Aun laa nug dab mak ena ele amu nug dod dakudnu eb qak eb qeku. Amuam danabnu eb qak, eb qak amuam 666.

14

144,000 DANAB AHI EDAPIG

¹ Amu da edue neeke amu Sipsip Nag Sion qaukopa dayeye, danab ah 144,000 Nug ele hipaidna daapig. Ag Nug onig amu Nug Mameg onig ele ag idulagpa yak. ² Ag daaegeg, da hab atannu baag oqoti enanag laa, le okai bududupa noawa oqoti ote amubia amu hakaq okai qa, adede ugaka oqoti ote amubia ele doomi. Da oqoti amuam musik bia doomi, amu danab gita qeeg, baag oqoti enanag

dootem, amubia doomi. ³ Ag dayaknu balal okai noobpa hab daup wadele, ag Kayaknu bauklel aoteb ele amu, ag noolagpa amu iki danab noolagpa ele ahi baula edapig. Laa oh ag ahi amu eb qena etaglagnu ii doopig, danab 144,000 Kayak Nug ag wanpanu danab ah oolagpanu edua diiom ele ag aakuib dooteb. ⁴ Danab amu ag gapai kobolpa bedulag dubutid ii medapig, ag opia awaknab. Ag Sipsip Nag aben ohpa gokunu ate amu ag Nug dim lamidna oiteb. Amu Kayak Nug danab amu wanpanu danab ah oh oolagpanu aona, Nug ag amu Sipsip Nag nuhignu ele, ag anuqak daaglagnu maatom. ⁵ Ag odelagpa nai ham buprak laa ii madipig, ag bedulagpa ehed hak laa ele iita.

ENGEL EWAM NAI MADIPIG

⁶ Aria da engel laa nug hagagada, Nug Nai Ena bauklel hanhannu ele, danab ag budub ohpanu, wan atu ohpanu, bedulag idu idunu amu nai ohpanu ele, ag amelagpa mehuqkunu hab waapa aben gamag amupa ugeke anidmi. ⁷ Nug baag okaipa aum. “Ag Kayaknu enanag doona, oolag ele otaieb, Nug binag meig! Adinu? Nuhig hetodiakpa danab ah epediadkunu haen aaku neum. Ag laa Nug hab, wan, yu, le, amu le qepudiatlak ele he bepig amu, ag Nug noobpa gatelag qaun oig!” awa aum. ⁸ Anam a amu engel namba 2 nug dim lamita ba aum. “Ab okai Babilon aaku na qeum. Nug he, atu atu danab ag gapai kobol gagatag dim lamidpigi. Kobol amuam ab okai amu nug grep lepu gagatag danab ah mate, ag laeg kaaka aqom bia,” awa aum.

⁹ Anam a amu engel laa engel adit amu dimlamata beum. Engel namba tri amu nug baag okaipa inam aum. “Aun laa nug dod dakud amu nuhig itotog ele noolahpa

gateg qaun waawa, nug idupa o epegpa nuhig eponak keeke aote ¹⁰ amu nug Kayaknu grep lepu laku. Grep lepu amuam opodi bak, Kayak Nug hipuninnu doote. Kayak Nug grep lepu amu le ele ii kaboliom. Iita! Nug opodi bak amu hai gokodpa qe noa daate amu danab amu laku. Lawowa, engel opia awak noolagpa amu Sipsip Nag noobpa ele nug guitak okainab, ab gakadak salpa ele, amupa guitak aoku. ¹¹ Ab ag guitak madaate ele amu, nuhig kahug amu haen oh tete. Danab ag dod dakud amu nuhig itotog ele noolahpa gatelag qaun onana, idulagpa o epegpa nuhig eponak keeke aopig ele amu, ag tuqan amun ele hik laa ii aomna,” awa aum. ¹² Keeke amu bekunu daate amunu Kayaknu danab ah ag Kayaknu do dim lamidteb ele, ag Jesusnu oopa genab doyak gagatag adateb ele amu, ag gagatag daaglagnu ipuanadte.

¹³ Aria da baag laa hab atannu doomi amu nug inam aum. “Na nai inam ye! Danab aun adi ag Nadi onignu oolagpa genab doopig amunu laa heeg, ag mauhtebe ele amu, Kayak Nug ag ititak madaate, hanhan ele madaku,” awa aum. Aria Kayak Oudi Nug ele ate. “Ag ahilag udatnu hik aoglag. Adinu? Ag ahilag hak ena hepig ele amu, ag amu ele aon gokulag,” awa ate.

E MEU AWAK HAEN

¹⁴ Aria da edue neeke amu lombig hakab laa anidmi. Laa nug danab bekalag bia, King igipanu bala golpa hak amubia Nug igipa dayeye, qep aeg ele laa nug epegpa adom. Nug lombig amupa dayeye anidmi. ¹⁵ Aniti amu engel laa nug mana metak lag oopanu dimitim doum. Amu nug danab lombig hakabpa dayom ele amegpa aum. “Wanpanu meu oh aaku odun malapig amunu wanpanu

meu awaknu haen miag doum. Doum amunu na qep nahip aona, meu amu awe!” awa aum. ¹⁶ Anam a amu laa nug lombig hakabpa dayom ele amu, Nug qep nuhig awa wanpanu meu odupig ele amu oh okulata diiom.

¹⁷ Okulata diie amu engel laa nug mana metak lag, hab atan daate ele, amupanu nug ele nuhig qep aeg nab ele ada, dimitim doum. ¹⁸ Adede amu engel laa ele nug qadabpanu aha doum. Engel amuam qadabnu ab adu gumaknu gagatag ele. Nug engel qep aeg nab adom ele amu, amegpa ewa aum. “Na qep aeg nab ele nahip amu aona, wanpanu mudu grep meu oh okuladna, qag mepe dayad! Adinu? Meu oh odun malapig!” awa aum. ¹⁹ Nug anam a amu engel amu nug qep nuhig aeg nab ele amu awa, wanpanu mudu grep meu oh nab okulatom. Okulata, grep meu qag ma, grep meu oh men grep lepu titiaknu keeke bapaidpigpa ake nopig. Keeke imu am hipuninnu nob nau, Kayak epegpanu udite ipunigte. ²⁰ Amu ag grep meu, men wain titiaknu ab okainu ad dimitim apa bapaidpigpa titipig. Titieg, tiig noa am ba, leta dimitim ba, 200 mael anam ukom. Unuqag nuhig am hapahap ewam bia.

15

ENGEL EBLAIH ADIT KEEKE EBLAIH ADIT ADALADPIG

¹ Amu dimpa da eponak keeke okai laa hab atan be anidmi. Da engel eblaih adit ag keeke naunab, amupa ag danab ehednab hadkulag ele amu, da ag anadmi. Amupa opodi bak, Kayak Nug danab dilag hipuninnu doote amu, opodi bak amu nug gogpa teete. ² Am da le ameg bia, nug am letod ab adu ele kaboliak bia, anidmi. Amu danab

ag dod dakud amu nug itotog ele binalah ii menan, nug onignu letanu eb qak ele amunu eponak keeke ii aopig ele amu, ag le ameg amu daugpa hipaidpig. Ag epelagpa keeke gita bia, Kayak ag matom ele amu, amu ele adapig. ³ Ag anam daanna, ag Moses, Kayaknu udat danab, nuhig ahi amu Sipsip, nuhig ahi ele etanna inam apig. “Nahip hak amu okainab, kobolnab ele. Nadi Kayak, na ebhinnab ele! Nahip ib am ib tutuku, genab ele. Na wan oh dilag King hanhannu. ⁴ O Nadi, na aakuib opia awaknab daatem amunu aun laa nahipnu enanag ii doyaya, oo ele ii otaiab, na binan ii meku? Atu atu danab oh ucin, na noompaib gatelag qaun ona, binan mekulag. Nahip kobol tutuku amu miag atia beum amunu ag hekulag,” aon apig.

⁵ Amu dimpa da neeke amu hab atannu mana metak lag oopa, aben gunnab daate, Kayak aben amupa daate ele amu, da oo amu matulak dayeye anidmi. ⁶ Matulak dayeye amu engel eblaih adit ele ag lamen hakabnab, opia awaknab, onig linen, amu takona amu ag momolagpa matagid gol taliliak ele takan, Kayak topanu dimitim dopig. Ag keeke nau danab heeb nauhkulag nu adapig. ⁷ Doeg amu hab daup wadele, ag Kayaknu bauklel aoteb ele amu, ag oolagpanu laipu laa nug tapid golpa hak ele eblaih adit ele engel eblaih adit ele amu matom. Tapid amupa hipuninnu nob nau, Kayak epegpanu udite, amu dayom. Kayak, Nug haen oh daate. ⁸ Mate, Kayak binag amu Nug ebehi ele a heeh, ab kah mana metak laka am beum. Am laipu laa nug lag oopa nokunu elele iita. Ag engel eblaih adit amu amelag mebepeg, ag keeke nau eblaih adit ele amu hena malapeg nokulag.

16

TAPID EBLAIH ADIT

¹ Anam dayeye, da baag laa mana metak lag oopanu engel eblaih adit amelagpa aawo doomi. Nug inam aum. “Ag tapid eblaih adit ele, opodi bak, Kayak Nug danab dilag hipuninnu doote, nug tapid amupa daate amu, ag tapid amu aon gona, wanpa gokadeg!” awa aum.

² Anam a amu engel namba wan amu nug wana, opodi bak, Kayak Nug danab dilag hipuninnu doote amu, opodi bak amu tapid nuhigpanu gokade, wanpan danab ag dod dukudnu eponak keeke aona, ag nug itotog noobpa gatelag qaun ona, binag meteb ele, amu dilagpa noum. No, ihilag naunab mate, ehed guatom.

³ Engel namba wan dim lamitak, namba tu nug wana, opodi bak, Kayak Nug danab dilag hipuninnu doote amu, opodi bak amu tapid nuhigpanu amu gokade, yupa no amu yu edua danab mauhak tiig bia daye, yupanu keeke bau amu ohnab mauhadpig.

⁴ Mauheg amu engel namba tri nug wana, opodi bak, Kayak Nug danab dilag hipuninnu doote amu, opodi bak amu tapid nuhigpanu, lepa, le qepudia bak ele, amupa gokade no, le tiig eduom. ⁵ Tiig edue amu da lepan gumak engel laa nug inam Kayak amegpa aawo doomi. “Kayak na gemu daatem, anuka daame. Na opia awaknab. Na haen imupa amu na danab nau hepig ele, na ag epediadna, tutuku hena, nob imu madatem. ⁶ Danab imu ag nahipad danab ah tutuku amu propet nahip ele ag tiilag adapig amunu na tiig lakulag nu matame, amupa na elelenab heme.” awa aum. ⁷ Anam a amu da qadab amupanu baag

laa eewo doomi. Nug ewa aum. “Ao genab, Nađi Kayak na ebehin oh ele, nahip epeđia nob maťak am genab, tutuku ele,” awa aum.

⁸ Aria engel namba po nug wana, opođi bak, Kayak Nug danab dilag hipuninnu dooťe amu, opođi bak amu tapid nuhigpanu gokade, Kayak nug anam hekunu elele a, aam gakađak, ab ađu bia, danab ewaťom. ⁹ Danab ag gakađak huanaknab amu ewaťa auta awe, ag Kayak onig dapidna, aon aon qeťeg, ag oolag ii eduom, Kayak binag ele ii mepig.

¹⁰ Anam daaegeg amu engel namba paip nug opođi bak, Kayak Nug danab dilag hipuninnu dooťe amu, opođi bak amu tapid nuhigpanu dođ dakuđnu dayaknu balalpa gokade, gatatu laa dođ dakuđ amu danab ah ag nug waapa daaťeb ele amu, ag oh tonaťom. Tonaťe amu danab ag guitaťak huanak doona, lemađulag emalna daapig. ¹¹ Ag guitaťak doona, ihilag ele aopig amge ag ahilag hak nau, amunu oolag laa ii eduom. Iiťa, ag tuđuidna hab aťannu Kayak dapidna, aon aon qedařig.

¹² Ag oolag ii edue amu engel namba siks nug opođi bak, Kayak Nug danab dilag hipuninnu dooťe amu, opođi bak amu tapid nuhigpanu amu Yupretis lepa, le amu qađa eťeb, aam bedepan king, amu dilag ib, ag gona ban hekulagnu bapaidkunu gokadom. ¹³ Nug anam he amu da ouđi nau ewam, ag oh og bia, dubuťilkad ahak ele, laipu mat nađi odepanu, laa dođ dakuđ odepanu, laa propet ham bupuak odepanu, anam doegeg anadmi. ¹⁴ Ouđi nau amu ag eponak keeke, danab hekunu elele iiťa heťeb. Ag wanpan danab ah oh dilag king diigdiig, ag Kayak, Nug gagaťag oh ele amu, nuhig ded nađipa ag Nug ele ban

hekulagnu qag madkulagnu gopig.

¹⁵⁻¹⁶ Ag gona, aben laa, Hibru naipa ag aben amunu Amagedon aṭeb, ag amupa king qag maadpig. Kayak Nug nuhig ded naḍinu inam aṭe. “Anteg! Da yabhok danab bia uḍitem amunu aun nug beḍu miag anidpeg, uḍa nemanu maḍaḍ maama, nuhig lamen atog noawa daaṭe amu, nug haen laa ban neeb, beḍu miag ii daama. Iiṭa, nug ena daaku amunu nuhignu am ena,” awa aṭe.

¹⁷ Aria engel namba sewen amu nug opoḍi bak, Kayak Nug danab dilag hipuninnu dooṭe amu, opoḍi bak amu tapid nuhigpanu gokade, ulahpa uke amu baag okainab laa Kayak dayaknu aben, aben amu mana meṭak lag oopa dayom ele amu, aben amupanu huanaknab e, ewak baag dimitim doum. Nug aum. “Iiku malom!” ¹⁸ Anam a amu amemḍi okai oqoṭi ele awewe, haḱaḱ ele qeum, mim okai ele neum. Dig makpa uḍie uḍie danab ah ag wanpa daaegeg, mim okai laa amu bia neene ii anidpig. Iiṭa! Neum imu am laa oh eḍatak. ¹⁹ Mim ne amu ab okai amu nug obate, maha ewam batete, aria atu atu dilag ab okai okai ag nena qepig. Haen amupa ele amu Babilon okai, nug Kayak daugpa do, Nug hipuninnu bu aqak, Kayak epegpanu uḍite, hai gokodpa grep lepu mua ele bia meṭe, Babilon laum. ²⁰ Nud oh ele iṭa mepig, wan beḍupa qauko ele baula ii dayom. ²¹ Amu ais, ahilag ug anen anen amu 50 kilogram anam, habpanu nena, danab oh qadelagpa qeeg, danab ag nauhna autna aopig amunu ag Kayak ḍapidna, aon aon qedapig.

¹ Amu dimpa engel eblaih adit ag tapid eblaih adit ele, amunu oolagpa laipu laa nug doa, da amelpa inam aum. “Na inam dope, da gapai ah okai nug le kudum qadelagpa daate ele, nuhig nob mak ipunidkul. ² Nug wannu king ele gapai kobolpa oipig. Wanpanu ag nuhig gapai kobolpa danab le gagatag lawona, kaaka aqate amubia kaaka aqom.” awa aum. ³ Awa a amu Kayak Oudinu gagatag dahilpa am ba he, nug omaida, atu tadakpa aben danab ii daatebpa uke amu da ah laa nug dod laa bedu nakok hinqak kokod ele bia qadepa dayeye anidmi. Dod amupa amu nai nau kudum bedupa yak ele, nug iki eblaih adit, nug qeqedi eblaih laih ele. ⁴ Ah amu nug lamen kokod diig adit, golpa bala diigdiig ele amu bala laa menpa hepig amu oogog ele, nuhig nob okai ele, ele meum. Nug epegpa hai gokod golpa hak ele adom amu kobol nau, bedak, udig ahak, amuam ah amu nug nuhig gapai kobol, keeke amu oh Kayak amegpa hai gokodpa am bak dayom. ⁵ Nug idupa onig laa nai tonakpa yaapig. Onig amuam inam. “Ab okai Babilon, nug gapai ah, nug ah oh gapai heteb ele amu wanpanu keeke naunab amu oh ele anilag.” ⁶ Da ah amu nug opia awak danab amu Jesusnu propet ele ag tiilag, le gagatag lateb bia laa, kaaka qe haaha dayom. Da antena, da otiae, dab mak kudum aomi.

⁷ Dabmak kudum anam aoyi amu engel laa nug da amelpa aum. “Na adinu dab mak kudum aotem? Da geha gapai ah, nuhignu nai tonak amu dod dakud iki eblaih adit, qeqedi eblaih laih ele, nug ah amu maote, amunu ele diig mehuqpi dookut. ⁸ Na dod dakud anidme ele, nug tatam dayom am gemu nug ii daate amge dimpa nug wan

mod, ode batak iita elepanu beku. Ba amu nug geha iita meku. Wanpanu danab ah laala ag buk laa, onig bauklel awa onig yaknu buk, Kayak nug wan heum, haen amupa onilag buk amupa ii yak ele, ag dod dakudnu dab mak kudum aoglag. Adinu? Anuka nug dayom, gemu ii daate dimpa nug modpanu beku.

⁹ Imu amu danab nug dab mak ena ele amu nug dookunu ipunigte. Iki eblaih adit amu qauko eblaih adit ipunigte. Gapai ah nug amupa daate. King eblaih adit ele daateb. ¹⁰ Tanig ele amu ag aaku bena, nena qepig. Laipu laa amu daate, laipu amu nug ii beum. Nug ba amu nug haen tutuib daaku. ¹¹ Aria dod dakud nug tatam dayom ele, gemu nug ii daate amuam king eblaih ewam. Nug king eblaih adit abenlag awa amu nug geha iita ma auta aoku.

¹² Amu na qeqedi eblaih laih ele anidme amu, ag king ii bepig amge ag dod dakud ele gagatag aona, aua laipu anam bena, king daaglag. ¹³ Ag ahilag dab mak laipu amu ag onilag okai, ag gagatag ele keeke amu oh dod dakud metaglag. ¹⁴ Medapeg, ag Sipsip Nag ele nug qena, Sipsip Nag Nug ag oh edadku. Adinu? Nug am okai dilag Okai, king dilag King. Amu laala ag Nug ele daateb, Nug baagib dim lamidteb, Nug ag nuhig daaglagnu tituanatom, ag nuhig nai tutuku dim lamidteb ele, danab amu ag oh Sipsip Nag ele ban edidkulag.” awa aum.

¹⁵ Anana amu engel amu nug baula da amelpa aum. “Na le kudum, gapai ah nug amu qadelagpa dayeye anidme ele amu, le amu nug danab bedulag idu idu, danab ameg okai qag mena daateb, danab ah wan atu ohpanu amu nailag aben aben ele ipunigte. ¹⁶ Am na qeqedi eblaih laih ele anidme amu, ag oh amu dod dakud ele ag gapai

ahnu oolagpa nau, ninig ele dooglag. Ag anam doonna, ag nug hepeg nauhku. Lamén nuhig oh udidpeg, nug beđu miag daaku. Ag nug tepu lakulag. Nug ebehi amu ag ab adupa maipég eoku. ¹⁷ Ag oolag laipu mena, gagaṭag, ag amupa king daateb ele amu, ag oh gagaṭag amu dod dakud meṭaglag. Ib amupa ag Kayak nug dab mak amu oolagpa meum amunu ag Nug keeke anam beḱunu aum amu genab hepeg meu beḱu. Ag anam hepeg uḱeb, Kayak nai aum amu oh meu medaku. ¹⁸ Aria na ah anidme ele, nug am ab okai, nug wanpanu king oh ikilag daate,” awa aum.

18

BABILON NAUHOM

¹ Keeke amu oh dimpa engé laa nug hab aṭannu neene anidmi. Nug gagaṭag okainab ele, nuhig bala amu he, wan oh amahlom. ² Nug na, baag okaipanab ewa aum. “Ab okai Babilon aaku nauhom! Aaku na qeum! Nug aaku ouḱi nau daaglagnu abenlag daate. Ouḱi nau, ai opia awak iṭa amu ai laala naunab abenlag ele. ³ Aḱinu? Danab ah kuḱum wan atu ohpanu nug ele gapai kobol, danab le gagaṭag laeg kaaka aqate, amubia hepig. Amu king atu atunu amu ele nug ele gapai kobol hepig. Danab ah wanpanu men doḱo uḱat heteḱ ele, amu ele ag nuhig kobol ehedpa enulag ele daapig,” awa aum.

⁴ Amu da baula baag laa hab aṭannu be doomi amu nug inam aum. “Dahilad danab ah ag nug oopanu uḱin, dimitim ipa doig! Iṭa dayeb, ag nug ou qepeg, ag nug ele nuhig hipuninpa daaglag, nuhig hipunin nob amu ele ag nug ele aoglag. ⁵ Aḱinu? Nuhig hipunin, ameg naḱi qauko bia, hab aṭan daaegeg, kobol nuhig tutuku iṭa amu

Kayak daugpa doum. ⁶ Ag nuhig kobol nau amunu dab mena, nob eledenab edun meteg! Nug kobol nuhig nau qag me, kudumnab beum, amubia ag tudidna, ag nuhig nob nau qag mena kudumnab meteg! Nug le gagatag hai gokodpa kaboliom bia ag ele le gagatagnab tudidna, hai gokod amupa kabolina, kudum meteg! ⁷ Nug nuka enaen ma, binag humama, keeke ena enaib aokunu wagai ma, kobol kudum heum. Amunu ag nug guitak melemel amupaib meteg! Nuhig gayak ele melemel amupa mena hepeg, nug gayad! Adinu? Nug, 'Da kuin, da ah qab iita amunu gayak baag laa dahilpa ii bema,' ate. ⁸ Anam ate amunu keeke nau diigdiig oh ded laipupa nuhigpa beku. Ode kudum beku, danab kudum ehednab gaaglag. Enug haen nadi ele beeb, ab okai Babilon ele ab eweb iita meku. Adinu? Nadi Kayak, Nug gagatag okai ele, Nug epeditte.

⁹ Wanpanu king ag ah amu ele gapai kobol henana, kobol nau kudum ele hepig amunu geha wanpanu king ag nug ab adupa eweb, nuhig ab kahug anidna, ag momolag qeutnana, bedulag pakunna gaaglag. ¹⁰ Ag pide daanna, nuhig guitak amunu badana akulag. "O gadonnab Babilon! Na ab okai, na gagatag okai ele amge aam ameg laipupaib nahip hipuninnu nob nau aaku neum," aon akulag.

¹¹ Danab ag enulag udat heteb ele amu, ag ele nuhignu dab mak aonna, oolag ug ele dayeb, gaaglag. Adinu? Ab amupan danab ag ahilag keeke ele baula daden ii memana.

¹² Keeke amuam gol, silwa, men ena, linen lamem, lamem kokod diigdiig, lamem laa silkpa hak, ad mutudig ele diigdiig, keeke laala ag dod onig elepan aelagpa hoipig ele

amu, keeke laala, ad maha nob o_kai elepa hepig amu bras, aen, men geda_dlak ele. ¹³ Keeke laala imu ele laa sinimon, lanaknu qanai, kalu mutudig ele, bala goden, wain, wit, wit kalu amu bulmakau, sipsip, hos karis ele, begbeg danab ele. Keeke amu oh amu ab o_kai amunu danab ag baula daden ii memana. ¹⁴ Danab ag enulag_nu u_dat heteb ele ag a_kulag. “Keeke oh na haen oh aokutnu oot huana dayom amu, na baula ii aomna. Na enun oh padal meum amu na keeke amu oh baula ii anidmana,” aon a_kulag. ¹⁵ Aria danab ag keeke amupa enub u_dat henana, men dodo ab o_kai amupanu aopig ele amu, ag guitak nau ab o_kai amu awom amunu ba_dana autna aona, pide umanab gona gaanna, oolag ug ele daanna, ¹⁶ a_kulag. “O gadon gadonnab ab o_kai. Anuka nug linen lamen enanag amu lamen kokod diigdiig ma amu golpa, men enanagpa amu oogog daden o_kai elepa bedu bala medtom. ¹⁷ Amge aam ameg laipupa nuhig enub amu oh iita meum.” Ub gumak danab, danab ub daden mena, ubpa tena, yu qade_pa ab laapa goteb ele, ub gumak danabnu u_dat nid amu danab men dodo u_dat yu qade_pa heteb ele amu, ag oh ab o_kai amu anidna, pidenab daaglag. ¹⁸ Ag ab o_kai Babilon eweb, nuhig kahug amu anidna, enan a_kulag. “Ab aten amu ab o_kai umu ele elele?” aon a_kulag. ¹⁹ Ag anam anana, ag wan gapud agapeg, ikilagpa teeb, oolag mabateb, gayak oolagpa am beeb, enan a_kulag. “O gadon gadonnab. Danab oh ag ub yu qade_pa oiyakpa ag keeke awona, ab o_kai amupa meeg, daden meegeg, enulag ele daapig amu, aam ameg laipupa ab o_kai amu aaku iita meum,” aon a_kulag. ²⁰ O hab, na nuhignu oot gamag ahad! Amu opia awak danab, Kristusnu total danab amu

Kayaknu propet, ag ele anam heig! Kayak Nug ab okai amu nug ahilagnu heum, amubia nug nob metom.

²¹ Nai amu oh male amu engel ebehi ele laa nug men okai ug ele huma, yupa budie noowo aum. “Babilon nadi, nug anam aaku na qeku, baula ii daama. ²² Nahippa gita oqoti, musik diigdiig haknu oqoti, dumutum iwalaknu oqoti, biugal iwalaknu oqoti ele amu baula nahippa ii daama. Danab ag udat amu ohnu sul hepig ele amu nahippa baula ii anadmana, men wit lab kalu nekunu keeke amu nuhig oqoti ele baula nahippa ii daama. ²³ Amahlak ag baula nahippa ii amahlmana, danab ah aokunu, ah nug danab aokunu hobul amunu musik oqoti ele nahippa baula ii daama,” awa aum. Anana amu nug nai tudita aum. “Anuka nahipad danab enulag ele ag wanpanu danab okai daapig amu na onig awak kobol nahippa na atu atu danab amelag aonna, ham ele bupualadme. ²⁴ Laa ele Kayak Nug ab okai amupa nuhig propet amu nuhikud danab ah oh tiilag wanpa ne antom amunu Nug epediak amu aoku,” awa aum.

19

KAYAK BINAG MAK

¹ Keeke amu oh dimpa da danab ah ameg nadi baalag okai pa hab atan eegeg doomi. Ag inam epig. “Ig Nadi onig binag ele humatu! Nug aakuib ig edua awikom. Nug onig okai, gagatag oh ele. ² Nuhig epediak amu genab tutuku opia awak ele. Gapai ah nadi amu danab ah wanpanu oh nuhig gapai kobolpa he nauhpig amunu Kayak Nug ehed hak nuhig amu nob meum. Ah amu nug Kayaknu udat danab ele aqe mauhpig amunu Kayak nuhig ehed amunu nob edua metom,” aon apig. ³ Ag baula edun enan apig.

“Ig Nađi onig binag ele humatu! Ah ođai amu nuhig ab kah hanhan hab ađan teđe,” aon apig. ⁴ Anam aegge amu iđi danab 24 amu hab daup wađe,le, ag Kayaknu bauklel aoteb ele amu, ag Kayak, Nug nuhig dayak balalpa daate, nug noobpa gatelag qaun ona, unuđidna apig. “Genab, ig Nađi Kayak onig binag ele humatu!” aon apig. ⁵ Ag anam aeg, dayaknu balal ođaipanu amu baag laa ewa aum. “Kayaknu uđat danab ag Kayaknu enanag doon, ag oolag ele ođaite amu, ag ođai ođai naunau ele ag ihinig Nađi binag humeg!” awa aum. ⁶ Nug anam a amu da keeke laa danab ah kuđum baalag bia amu le kuđum gonana oqođi ođeb bia amu hađađ ođai tuđid ele qaaqa oqođi ođe amu bia dooi amu ag enana apig. “Ig Nađi Kayak onig binag humatu! Nađi, ihinig Kayak, Nug am ig Mamenig amu Nug King genab daate!” ⁷ Gemu ig oonig gamag aheb, binag metu! Sipsip Nag Nug nuhig ah aokunu haen aaku beum. Ah nuhig nug amu nuđa babaitom daate. ⁸ Dayeye, Kayak Nug linen lamen hađab enanag opia awak amahalaknab ele nug mekunu metom,” aon apig. Lamem hađab enanag amuam Kayaknu kobol ena tutuku nuhiđud danab ah heteb ele ipunigte.

⁹ Amu dimpa engel nug da amelpa aum. “Na nai imu ye! ‘Danab ah amu ag Sipsip Nagnu ah awaknu hobulpa uđiglagnu, Kayak onilagpa eum ele amu, ag ititađ ena aopig daateb,’” awa aum. Anana amu nug da amelpa aum. “Nai imu amu Kayak ođe, nai nuhig am nai genab.” ¹⁰ Anam a amu da nug binag mekulnu nug baegpa gatel qaun omi amge nug da amelpa aum. “Na anam ii hemanal! Da na amu, na laipad ele, ag oh Jesusnu oolagpa genab doonna, Nug onignu maditeb ele amu, ig oh am uđat laipu.

Na Kayak noobpa gaten qaun o! Adinu? Nai genab Jesus danab ah ipuanatom, amuam he, propet ag nai maditeb,” awa aum.

DANAB HOS HAKAB ATAN OIYOM

¹¹ Nug anam a amu hab obate, da hos hakab laa dayeye anidmi. Laa Nug hos amu atan dayom amu, Nug onig am, “Danab Nug Nuhig Udat Tutuku Atog Note Ele.” Danab amu Nug kobol genabib hete, epediak kobol, ban hak kobol ele amu kobol tutuku opia awakib hete. ¹² Nug ameg amu ab ditiaak bia, nug igipa king igipanu keeke kudum daapig. Nug onig am laa oh edatak, danab laa nug onig amubia iita. ¹³ Nug lamen elab, tiig laaitak ele meum. Danab ag nuhignu, “Nug onig amu Kayak Nai,” aon ateb. ¹⁴ Hab atannu ban danab ag ahilkad hos hakab enanag qadelagpa daanna, Nug dim lamidna oipig. Ag linen lamen hakab, opia awaknab ele ag bedulagpa maadpig. ¹⁵ Ahilag okai amu qep aeg ele noob hawadnab, Nug danab wan atu oh aqakunu, Nug odepanu doa ukak dayom. Nug aen bu ada, bu amupa Nug danab ah gumadku. Nug geha grep lepu awaknu keeke tabaku. Amuam hipuninnu bu aqak, Kayak gagatag oh ele epegpanu udite, amu ipunigte. ¹⁶ Lamem nuhigpa amu nug baegpa ele nai imu yak ele dayom. “Nug am okai dilag Okai amu king dilag King.”

¹⁷ Aria da engel laa aam amegpa hibaita dayeye anidmi. Nug baag okaiipa, ai oh hab waapa oiteb ele amu, ag onilagpa ewa, inam aum. “Ag oh udieg! Udin Nadinu e lanak balalpa dayeg! ¹⁸ Ag king tepulag, daup iki tepulag, danab gagatag ebehilag ele tepulag, danab amu hos ahilkadpa daapig ele amu, tepulag ele laig! Ag danab

oh tepulag lakulag. Danab begbeg iita, begbeg danab, danab onilag ele amu danab onilag iita amu oh,” ewa aum.

¹⁹ Am baula da dod dakud, wanpanu king amu ahilkad daup ele qag meegeg anadmi. Ag danab nug hos hakab atan dayom ele amu nuhikud daup ele ban hekulag nu daapig. ²⁰ Daaegeg amu ag dod dakud adan, propet ham bupuak ele adapig. Propet amu nug dod dakud noobpa eponak keeke kudum danab hekunu elele iita heum. Kobol amupa nug danab oh, ag dod dakudnu eponak keeke aopig, dod dakud dotog binag ele mepig amu, nug ag ham bupualatom. Amunu dod dakud nug propet ham bupuak ele a bau anam daaeheh, ag a adalatna budiateg, mod okai gotupa ab adu men salpa eotepa budiateg nopid. ²¹ Budiateg noeh am danab hos hakab atan dayom ele amu Nug ahilah daup danab laa oh qep elab aeg hawad ele, Nug odepanu doa ukak dayom amu, amupa aqom. Aqe, ai oh ag danab amu oh tepulkad laeg, oolag huanaknab ditiom.

20

MAD 1,000NU NAI

¹ Aria amu oh malak dimpa da engel laa hab atannu neene anidmi. Nug epegpa mod umanab, batak iita ele odenu ki adom. Nug mudu okai laa ele adom. ² Nug mat nadi anukanunab amu adom. Nug am Satan, danab ah hipuninpa eedatak danab. Nug nug ada, mad wan tausen daakunu hipalom. ³ Engel nug anam ha, nug mawe, mod umanab, batak iita elepa no, od mana, qadepa eponak keeke gagatag meum. Nug baula mad 1000 amu oopa atu atu ham ii bupualadma. Dimpa mad wan tausen maleb

amu laa nug matula uhuqeb doa, haen tutuib aben ohpa oiku.

⁴ Amu da king dayaknu balal laala anadmi. Kayak Nug laala ag hetodiakpa danab ah epediadkulagnu udat matom ele amu ag dayak balal amupa daapig. Daaegeg amu da laala ag Jesusnu oolagpa genab doonna, Nug onignu madipig, ag Kayak nai gagatag adapig amunu ag baalag otadpig ele amu, da ag dotolag ele anadmi. Danab amu ag dod dakud dotog noobpa ii dup nopig, ag idulagpa epelagpa ele nuhig eponak keeke ii aopig. Danab amu ag edun hipaidna bauklel aona, Kristus ele gumak udat mad wan tausen henan daapig. ⁵ Amuam danab edua hibaitak anuqak aaku. Laala mauhpig ele amu ag mad wan tausen amu male, edun hipaidpig. ⁶ Aun nug edua hibaitak namba wan amupa edua hibaita, hanhan daate ele amu, nug am Kayaknu ititak awom, nug am opia awak ele. Amu ele mauhak dimpanu nug danab amu heeb, nau aoglagnu gagatag iita. Ag mad wan tausen amu oopa ag Kayak Kristus ele dilah mana metak danab daanna amu Kristus ele king daaglag.

⁷ Dimpa mad wan tausen ueeb, laa nug heeb, Satan nug geha ad nuhig oopanu edua dimitim doku. ⁸ Amu nug geha dimitim wana, danab ah wan atu ohpanu ag Jesusnu keked daateb, amu nug ag bupualadku. Nug geha ban humaglagnu qag maadku. Eb qak ahilag amu yu ihpanu abud bia. ⁹ Aria da imu ele anidmi. Ag Israel wan oh tonan gona amu Kayaknu danab dilag ab okai, ab amunu Kayak Nug oo mauhte ele, amu talilidpig. Ge hab atannu ab adu na, ewate mauhpig. ¹⁰ Oudi nau bupualatom ele amu nug

ab ameg okai gaka₂da₂k elepa bu₂die noum, aben amupa propet genab iita, dod nau ele tatam bu₂diate nopid. Ag hanhannab tuqan amun ele ehed doonna daaglag.

¹¹ Da amu antena amu imu ele anidmi. Da dayak aben okai hakab ele, amupa Kayak Nug hedep na dayeye anidmi. Wan atu, hab ele nug noobpanu qelodieh, baula ii anatpig. ¹² Da aaku danab mauhadpig, okai nakok ele oh, Nug noobpa hipaidna daaegeg anadmi. Nug buk laala kola₂tom amu buk laa, onig bauklel awa onig yaknu buk, Nug buk amu ele kolom. Danab mauhadpig amu ag adi hepig, buk laalapa epediaknu amu yak niite amupa epedia₂tom. Amu oh ag adi hepig amupa epedia₂tom. ¹³ Yo, mauhak yupa daapig amu wanpa daapig amu hadespa daapig ele amu, oh ag Kayak noobpa daaegeg, ag adi hepig amupa epedia₂tom. ¹⁴ Aaku Hades, mauhak ele amu Nug ab amegpa bu₂dialate nopid. Ab ameg amuam mauhak namba tu. ¹⁵ Aun laa nug onig buk laapa, onig bauklel awa onig yaknu buk, buk amupa ii yak amu, nug ab amegpa bu₂die noum.

21

JERUSALEM BAUNU NAI

¹ Aria amu dimpa da aaku hab bau wan bau ele anatmi. Hab tatamnu wan tatamnu ele a iita mepid amu yu nug ele iita meum. ² Iita me amu da ab opia awak, Jerusalem bau, Kayak topanu neene anidmi. Nug am ah bau nug danab aokunu bala medapig amubia. ³ Anam daye amu da nai matiak baag okainab dayak balal okaipanu laa inam a doomi. “Gemu Kayak laug danab oolagpa daate! Nug ag ele daaglag. Ag nuhig danab daaglag. Kayak Nug ag ele

daaglag amu Nug Kayak ahilag daaku. ⁴ Kayak Nug heeb, amelag leb am iita meku. Amu ag baula ii mauhmana, ag baula ii mahimna, ag baula ii gaamna amu ag guitak ele baula ii doomna. Adinu? Anukan keeke amu oh iita meum.” ⁵ Am laa nug dayak abenpa daate ele amu Nug aum. “Amu gemu da keeke oh bau hadtem!” awa aum. Anam anana amu Nug baula ele aum. “Keeke imu oh na ye! Adinu? Nai imu am genab, ham bupuak iita,” awa aum.

⁶ Nug anam awowa, Nug baula da amelpa aum. “Keeke amu oh aaku meu beum! Da tatam daami, da hanhan daakul. Laa ag le baalag diite amu da ag le qepudia bak bauklele ele, nob iita, hamu madakul. ⁷ Am laa nug ban aeg oh edita, gagatag daate amu da nug imu medakul. Da nuhig Kayak daappi, nug dahil nid daaku. ⁸ Amge laa ag badteb, ag oolagpa genab doyak iita, ag kobol nau udig wak heteb ele, laa ag danab aqaeg mauhteb, ag gapai kobol heteb, ag bad mak danab, ag kayak ham bupuak noobpa gatelag qaun oteb, laa ag nai ham bupuak danab ele amu, ag oh mod umanab, batak iita elepa, ab gakaakad nadi men salpa eotepa ele, amupa aben aoglag. Amuam mauhak namba 2 aaku,” awa aum.

⁹ Anam a amu engel eblaih adit ag tapiid eblaih adit ele adaladpig, amupa keeke naunab danab he nauhaknu eblaih adit am bak ele, ag oolagpanu laipu laa nug doa, da amelpa aum. “Na do! Da ah makun bau Sipsip Nag wau amu ipunidkul,” awa aum. ¹⁰ Aria Kayak Oudinu gagatag dahilpa am ba he, engel nug omaide, qauko okai atannab amupa gomud. Goda amu nug ab okai Jerusalem bau, opia awak, Kayak topanu hab atannu uua ne amu

ipunide om. ¹¹ Ipunide amu Kayaknu amahlak okai ab amupa amahlom. Amahlak nuhig amu men laa, nuhig nob okai ele, onig jasper amubia. Jasper amuam le ameg enanag, opia awak ele, amubia. ¹² Ab amu nug ad okai atannab ele, nuhig od ode amu eblaih laih amu adit ele. Od ode amu gukualatak engel eblaih laih amu adit ele amupa daapig. Od ode amu ohpa Israel bekod budulag eblaih laih amu adit ele onilag ele yak dayom. ¹³ Ulah kadag uditepanu amu od ode ewam, yawalti uditepanu ewam, qaban uditepanu ewam, amu yau uditepanu ele ewam anam daapig. ¹⁴ Ab okai amunu ad amu nuhig mawa daakunu keeke am men kudum duqa ukak eblaih laih amu adit ele. Ad nug amu atan dayom. Amu Sipsip Nag ipunitak awak danab eblaih laih amu adit ele amu onilag men amupa ele yaalatak daapig.

¹⁵ Engel nug da ele nai matimud ele amu, nug bu golpa hak, ab amu nuhig od, amu nuhig ad ele melemel mekunu adom. ¹⁶ Ab okai amu nuhig melemel laih laih am atan ele am laipuib. Engel nug ab okai amu nuhig bupa melemel meum amu nuhig laih laih amu atan ele oh am okainab, 2400 kilomita. ¹⁷ Ab amunu ad am ele tepu melemel meum amu am hapahapa 150 anam. Melemel amuam danab melemel meteb bia. Engel amu nug melemel amupaib melemel meum. ¹⁸ Abnu ad am Kayak Nug men jasper amupa heum. Ab amu golpa heum am gol amu antak nuhig amu le ameg opia awak kinipan iita bia, o letod bia. ¹⁹ Ab amunu ad mawa daakunu men duqa ukak ele amu Kayak Nug men amupa men laala kobol ele diigdiig, ahilag daden okai ele, amu maatom. Men duqa ukak anuqak am men laa ednab onig jasper. Jasper

Revelesen 21:20 52 Revelesen 21:27

qadepa am men laa ed hinqak nakok ele onig sapaia. Sapaia qadepa amu men laa nakok hinqak onig kalsedon. Aria kalsedon qadepa am men laa grinnab onig emerol. ²⁰ Emerol qadepa am men laa, nug am kokod hakab ele, onig sadoniks. Sadoniks qadepa amu men kokod laa onig konilian. Men konilian qadepa amu men lanlan laa onig krisolait. Krisolait qadepa amu men laa, nakok grin ele onig beril. Beril qadepa amu men laa lanlannab onig topas. Amu topas qadepa men laa, nug ele amu grin, onig krisopres. Krisopres qadepa amu men laa ed kokod ele onig haiasin. Haiasin qadepa amu men kokod diig laa onig ametis. ²¹ Aria od eblaih laih amu adit ele amu keeke men bia onig perl, ag okai okai eblaih laih amu adit ele, od laipupa amu perl okai laipupa hepig. Ab okainu ib oh amu golpaib, antak nuhig enanag miag atiaknab letod bia.

²² Amu da ab amupa mana metak lag amu ii anidmi. Nadi Kayak, Gagatag Oh Ele amu Sipsip Nag ele a aakuib ab amupanu mana metak lag daatep. ²³ Ab amupa amu aam kalam ele a ab amu amahlak laa ii medatep. Kayak amu Sipsip Nag ele a ab amupa amahaltep amunu amahlak medatep. ²⁴ Danab ah oh ag ab amunu amahlakpa oiglag, wanpanu king ag ag binalag aon nuhigpaib udiglag. ²⁵ Amunpa ele ag ab amunu ad od ii maimna amunu nuhig od am haen laa manak ii daamna. Adinu? Gatatu ab amupa ii nema. ²⁶ Danab ag atu atu ohnu keeke o kobol binag ele amu keeke o kobol onig ele amu ag amu oh aon, ab amupa udiglag. ²⁷ Amu keeke nau dubutid ele ab amupa ii noma. Laa keeke naunab amu ham bupuk kobol hete ele amu, nug ele iita. Am laa ag onilag Sipsip Nagnu buk laa, onig bauklel awa onig yaknu buk, buk amupa ag onilag

yak daate ele amu ag aakuib ab amupa nokulag.

22

LE BAUKLEL ELE

¹ Amu dimpa engel nug bauklel le amu ipunidom. Nuhig amahlak amu letod bia amahlom. Le amuam Kayak amu Sipsip Nag ele ahilah dayak balalpanu ba ² ab okainu ib gamagpa goṭe. Bauklelnu ad amu nug le amu aka laih laih tagagdita, tapom daate. Nug meu amu mad laipu oopa haen eblaih laih amu adit ele niite. Kalam ohpa meu niite. Ad udug amu atu atu danab ah dilag ode babaitaknu ele. ³ Amu keeke oh, Kayak oo ii dayom ele amu, Kayak Nug heeb, iita mekulag, baula ii daamna. Kayak daakunu balal amu Sipsip Nag dayak balal ele amu, a ab amupa daaglah. Daaped, Kayaknu udat danab ag Nug ode dim lamidnana, binag mekulag. ⁴ Ag Nug idu anidkulag, Nug onig amu ag udalagpa daaku. ⁵ Gatatu baula ii daama. Lamnu amahlak am aam amahlaknu udat ele baula ii daama. Iita. Nadi Kayak Nug amahlak matebeb, ag haen oh king daaglag. ⁶ Amu engel nug baula da amelpa aum. “Nai imu am genabnab, danab ah oh ag oolagpa genab dooglagnu elele. Nadi, Nug propet nuhikud gumadte ele amu, Nug nuhig engel laa me, keeke oh paha bekulagnu daate amu nuhikud udat danab ipuanadkunu udiom,” awa aum.

⁷ Awa a amu Jesus Nug aum. “Anteg, da pahanab udikul. Aun nug Kayak nai, buk imupa niite amu, nug amu dim lamidte ele amu, nuhignu am ena!” awa aum.

⁸ Da Johannes, da nai imu doomi, da anidmi ele, da engel nug keeke imu oh ipunidom ele, da nug noobpa dup noin, nug binag mekulnu hemi ⁹ amge nug da amelpa aum. “Na

anam aib heme! Da na ele, na laipad ele, ig oh ihinig udat laipu amu ele da amu aun laa ag oh buk imupanu nai dim lamidteb ele amu, ig oh udat laipu. Na Kayak aakuib binag me!” awa aum.

¹⁰ Anana amu nug da amelpa aum. “Kayaknu nai buk imupa niite amu na aib toname. Kayak Nug keeke imu oh hekunu aaku haen o qiom ¹¹ amunu laa nug kobol nau hete amu nug huanak heku, dubutid ele amu nug dubutid ele daaku. Aun nug tutuku hete amu nug kobol tutukupa oiku, opia awak hete amu nug opia awak oiku,” awa aum.

¹² Nug anam a amu Jesus Nug aum, “Doyeg! Haen elab iita da ana udikul. Da daden ena ele awe udikul amu ag anen anen adi hepig amunu nob mada kul,” awa aum.

¹³ Jesus anam anana amu Nug aum. “Da tatam daami amu da hanhan daakul. Da anuqakpanu amu da dimpanu ele daatem. Genab da keeke oh gumadtem.

¹⁴ Am aun adi ag ad bauklelnu meu lakulagnu, ag ab okainu od odepa nokulagnu ag lamen ahilag ihateb ele amu, ag ititak ena aopig daateb. ¹⁵ Amge wan awak danab, gapai danab, danab qe mauhak danab, kayak ham bupuak binag meteb ele amu, laa oh ag ham bupuak kobol oolag metan heteb ele amu ag Kayaknu ab ad dimitim qai bia daaglag.

¹⁶ Da Jesus, da dahil engel laa mei, ahilagpa uka, nai dahil imu tamamiak ohpa ag amelagpa mehuqom. Da amu Dawit budub amu nug beka ele, da hodopai boitinannu amahlak,” awa aum.

¹⁷ Amu Kayaknu Oudi amu Sipsip Nag ele atep. “Na do!” Am aun nug nai imu doya nug, “Na do!” anad! Am laa ele, laa nug le baag diieb, am nug doad! Am laa nug le lakunu

amu nug doa, bauklel le lanad! Kayak Nug le amu hamu medte.

¹⁸ Danab oh ag Kayak nai buk imupa yak daate amu ag eb qena dooglag ele amu, da nai gagatag ahilagnu inam atem. Aun laa nug nai buk imupa niite ele amu awa, nai laa ele tudidku amu keeke nau kudum, Kayak Nug buk imupa amunu aum ele amu, Kayak Nug danab amu nuhigpa keeke nau amu oh qag meku. ¹⁹ Am laa nug nai laala buk imupanu heeb, iita meku amu Kayak Nug ele heeb, nug buk imu ate bia bauklel ad meu ii lama, nug opia awak abpa ele ii daama.

²⁰ Laa Nug nai imu oh aum amu Nug ate. “Yo, da paha eduen udikul,” awa ate! Ao Nadi Jesus, na udie! ²¹ Nadi Jesus Kristusnu ehaniak okai hamu megte ele amu, ag Kayaknu danab oh, ahilagpa dayad!

KAYAKNU NAI Tituanak Bau

The New Testament in the Nobonob Language of Papua New Guinea
Nupela Testamen long tokples Nobonob long Niugini

copyright © 1990 Wycliffe Bible Translators, Inc.

Language: Nobonob

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-02-07

PDF generated using Haiola and XeLaTeX on 27 Sep 2019 from source files dated 27 Sep 2019

ed374bb9-d819-53d1-a85b-f86cce3892e1